





國朝寶鑑卷之十

世祖朝一

世祖承天體道烈文英武至德隆功聖神明睿
欽肅仁孝大王

諱

永樂丁酉九月二十九日丙

子誕降于本宮在位十三年成化戊子九
月八日甲子昇遐壽五十二葬光陵

在楊州

上世宗第二子初封晉平大君後改咸平
又改晉陽又改首陽孝友恭儉英明絕倫五
歲誦孝經及長博通書史尤好讀性理書凡

曆數音律醫卜技藝皆盡其妙嫻於射御常以弓矢自隨世宗器愛異於諸大君軍國大事委令參決嘗馳下峻坂馬躓墜岸下鞍馬俱碎上飛身登岸無所傷老武人泣曰不圖復見太祖神武也廣平大君璵觀上之射問曰弓不良矢何疾也上曰善書者不擇筆善教者不擇人君子行仁不擇地志士行義不擇時昭憲后喪上哀毀踰制文宗手書戒之曰居喪以徑情為法則曾子必不勝喪今首陽多病其省之嘗受

文宗命定陣法鄭麟趾疑連陣合陣非古之法上曰諸葛亮之八陣是連陣法也李靖之合隊是合陣法也端宗即位以上屬尊位輔弼裁斷庶務及策靖難勲朝野益倚重焉乙亥閏六月端宗以國事多艱下禪位教上涕泣固辭端宗親奉大寶以授于上教書曰予小子遭家不造幼冲嗣服深居宮掖之中內外庶務蒙未有知致兇徒煽亂國家多故叔父首陽大君諱御奮發忠義左右我躬克清羣兇弘濟艱難然兇徒未殄

變故相仍屬茲大亂非予寡躬所能鎮定宗
廟社稷之責實在我叔父叔父先王介弟
以德以望有大勲勞於國家天命人心之所
歸也茲釋重負以畀我叔父嗚呼宗親文武
百官大小臣僚其匡輔我叔父以對揚祖
宗之休命金禮蒙撰也於是上具冕服即
位于勤政殿尊端宗為上王受百官賀頒
教大赦上進箋謝于上王與讓寧大君
禔等迭進爵為歡越十日甲子上自邸入
御于景福宮上王自景福宮移御于昌德

宮命以每月二日十二日二十二日親問起居于上王有故則次日乃進○領議政鄭麟趾請置錦城大君瑜於法上曰瑜之黷配欲使知戒卿等勿復言初瑜從上受易最被眷愛至是數與武士托射會宴飲於私第故大臣疑之論竄嶺外而上猶手書通問賚遺絡繹○上問都承旨申叔舟曰經筵入主與儒臣講道義論政治者也予欲日御經筵只令承旨集賢殿史官各一人入參可乎宋元節要通鑑綱目大學衍義皆切於治

道當以何者為先乎人君接見大臣之時固多至於微官無由得見予欲復輪對之法而但恐有讒慝者後世人主或信之故欲令四人進對當以何品以上進對亦可使武班先之乎叔舟對曰三書皆不可廢然近代事賞先也輪對之時四人並入則或有支離之弊人不得盡其所懷只令二人及史官進對而必文武相間且依文宗故事六品以上進對則庶乎其可也上從之○禮曹啓請宗廟文昭殿之文宗室祝文稱嗣王臣顯陵

則稱嗣王昭陵則稱國王如其言○命凡經
筵集賢殿二員進講諫官亦入叅其集賢官
供給使政院點檢勿踈虞○命集賢殿校理
韓繼禧等註貞觀政要 上嘗受 上王命
註政要未畢故有是命○飭中外享祀奠物
務盡蠲潔祭器悉令改作○上親享宗廟告
即位還御殿受賀除山棚歌謠設飲福宴于
慶會樓時久旱而雨 上喜甚命申叔舟以
創業守成之難易為文以進在坐者及集賢
殿館閣儒臣皆令製詩復賜堂上官以下諸

執事飲福宴于禮曹○集賢殿直提學梁誠之上疏言人君享國之長在得民心周之固結人心漢之休息生民是已愛民之道無他不過輕徭薄賦省刑三者而已後世田政紊而為私田兵制廢而為私兵世宗時元典續典又有謄錄皆良法也然田制儀註未成一定之制兵制貢法多為權宜之政乞命大臣更加商確以為萬世之法焉上嘉納○諭諸道觀察使凡不急之務一切停罷以便於民○教曰予以眇末承上王付畀之重

托一國臣民之上闇於為理明有所不燭智
有所不周宜博採衆言以補不逮其令中外
文武百僚下至民庶於寡人闕遺生民弊癘
時政得失法度臧否凡可以有補新政者各
實封上聞毋拘忌諱毋嫌切直盡陳無隱以
副予願治之心言有可採予則嘉納雖或不
中亦不加罪惟爾政府體予至懷曉諭中外
○黃海慶尚道有百六七歲老人命賜衣食
○秋七月冊樂浪府夫人尹氏為王妃元
子為王世子東宮舊無鹵簿至是始命參酌

世宗朝東宮叅決庶務時例置儀仗復命講書時書筵官二員臺諫一員入叅○工曹請造中宮酒房金盞上曰其以磁代之尚衣院請造東宮銀硯爐上曰後世子孫生長宮中易至侈肆豈宜復以奢導之昔唐宗作銅硯爐以天下之富尚如此況其他乎○諭平安道觀察使竒虔曰沿江鎮民每春夏布野秋冬入保未得恒居一處緣葛菱土宇禦寒之備虛踈農牛戰馬多至羸斃卿其曲盡布置及草未枯多收委積沍寒前堅築土宇

務要人物不至於饑凍損傷○命宗廟社稷
諸陵大享忌辰齋戒停視事○八月命鞫禮
曹叅判河緯地既而釋之上教曰三公不
親細務六卿分職以治古制也仍命六曹公
事自今其啓緯地諫曰三公論道經邦故六
卿雖分其職冢宰實兼治之周制然也上
怒曰緯地阿附大臣欲以國家庶務悉委之
政府乎其令王府鞫之尋復教曰此人素有
正直之名予欲聞過失也命復就職使承旨
諭之曰毋以今日之故不言予過失也○日

本五島宇久守源勝肥前州丹後太守源盛
各遣使入貢自是日本諸州歲貢不絕○親
祭社稷設飲福宴于思政殿○命梁誠之撰
地誌地圖○策佐翼功臣韓明澮申叔舟等
賜鐵券施賞有差 上教曰頃當否運宗社
不振蒙天之力靖國大難致世清平 上王
以予有微功委之輔政兼任將相功高權重
為世所忌茲臣餘黨潛懷報復之計禍將不
測桂陽君璫鈴川尉尹師路申叔舟權孽韓
明澮政府六曹共相佐翼勸我除凶不然則

宗社安危未可知也得有今日誰之力也惟
爾政府速舉策勲之典於是策勲同盟 上
韋昌德宮謁 上王宴諸功臣兵曹判書李
季甸諫 上過飲 上執其手曰愛我也命
季甸起舞○疏球使臣倭僧道安上其國王
尚泰久書契獻花錫蘇木願得藏經許之○
申明種桑之法從戶曹請也大戶三百株中
戶二百株小戶
株一百株殘戶五十
株剪伐者罪之○遣兵曹郎於諸道檢覈
軍政○九月親祭于獻英二陵○上幸學率
百官學生親酌獻于先聖退御明倫堂命講

書官兼司成金鉤集賢殿副提學金禮蒙等
講河圖洛書究陰陽理數生成變合之妙鉤
即上潛邸時宗學博士深加禮待○命諸
道要害地設鎮置將管轄諸邑分為中左右
翼京則闕內各司諸貢皂隸隸之兵曹輪回
習陣點閱衣甲○飭諸道監司刺舉守令之
營私行賂枉刑傷民者○冬十月命校書館
印所藏王羲之趙孟頫書法送于成均館令
學生作為楷範○女真萬戶好時乃等入貢

丙子

元年春正月

上詣昌德宮進豐呈宴于

上王御忠順堂命內禁衛兼司僕射帳謂承
旨李徽曰予昔在軍門內外如一今深居九
重只與宦寺居耳目多有所蔽自今宗親一
人及兼司僕兵曹官吏輪番直宿於是軍士
直宿於思政殿行廊兵曹堂上都鎮撫直宿
於勤政殿東廊○上語承旨等曰中宮欲以
四民圖代歲畫貼殿壁予以為不可中宮曰
食出於此衣出於此貼而見之不亦可乎遂
貼之承旨等對曰農桑王政之本而國母留
意實生民之福也○停春等講武以前歲歉

荒也○上御思政殿行常參設酌直提學梁
誠之言 殿下優禮大臣每設酌相歡真盛
事也然臣恐聖體過飲生疾 上悅命加誠
之爵一級○觀察使柳規有微失臺臣拷訊
其禮房吏 上謂分司憲執義姜晉曰觀察
使統察一方有小失尚不宜輕劾今替治其
吏是豈予分遣本意乎勿復爾也○命隆冬
盛暑外日御經筵謂筵臣曰經筵所以接賢
士大夫講論治道非但為講讀而已近日經
筵官無有進言者得無懼予而然乎言雖不

中予不加罪也○教曰上林苑奴婢非不多
由園非不廣官吏慢不致意凡薦新進上之
果皆取民間其弊不此期以五年種樹培養
則可得成長結實但其未及成長之時薦新
及使客支待等不得已之事不得不取于民
間若進上則自奉一已不必取民間也○奏
聞使中叔舟等準請復命上下床而見之
賜酒曰昔與卿同行萬里又再同盟今克成
大事喜可知也賜廐馬○命內苑桑株分授
諸司栽植於墻下及田畔其不用心培養以

致枯槁者罪之○二月上御勤政殿親策
多士曰予以否德丕承基緒惟不克負荷是
懼夙夜勵精欲臻至治必廣諮訪姑舉其政
之大者言之賢才所當廣求而盡用踈遠之
臣遺逸之材豈能盡識故令大臣薦之銓曹
擬之又有保舉之法而賢愚尚混豈求賢之
路未廣歟何以則賢能畢進而野無遺才耶
官在得人不在貪多昔以天下人才之衆只
置貪七百三十況以一國而官冗可乎使冗
貪皆汰則擇材亦精矣汰之則何者當汰歟

城郭所以設險守國今沿邊郡縣修築粗完而內地則力未及焉何以則城堡必修而民不至困歟此三者子大夫素所講明而新政之所願聞其悉陳無隱仍幸慕華館試武士

○三月設耆老諸臣宴于普濟院賜酒樂

上復謂承旨朴元亨曰耆舊大臣餘生無幾今當宴會宜別有所賜遂賜司僕獵獸使元亨往諭耆老會遣承旨始此○領議政鄭麟趾以強盜充斥請令義禁府漢城府刑曹及外方守令倣古鈛笮之法許人匿名投告且

請強竊當死者勿令三覆隨即處死 上曰
投告之門一開則挾怨懷詐陰構禍亂者接
跡而起決不可行也且三覆之法所以求生
道也待時之法所以順天時也皆先王成憲
美意唐時必令五覆本朝降為三覆而初覆
則常致謹慎再三則漸至忽略况不念愛禮
存羊之意輕減其數乎○梁誠之奏曰自科
舉初場講經之後舉子輩多留意經學集賢
殿三館儒臣亦宜以此勸課也 上曰專治
一書則學問未博予於 世宗朝受命輯諸

經史多所涉獵至如律呂風水之書亦無不
講求然此等書固不可使講讀也若易之為
書至精至微上下二經固可以易治圖說繫
辭尤精邃難解此書既明則所謂觀於海者
難為水羣書可不治而自明也其勸課之方
令集賢殿議啓○賜文武及第任元濬魚有
詔等恩榮宴于議政府命都承旨朴元亨宣
醞○梁誠之疏陳治謨諸條郊天享帝也以
漢城為上京開城為中京慶州為東京全州
為南京平壤為西京咸興為北京也以三角

山為中嶽金剛山為東嶽九月山為西嶽智異山為南嶽長白山為北嶽其外岳鎮海瀆名山大川改定祀典也本朝樂之外復設日本女真樂賁飾太平也行冠禮以復先王之制也定上下服色以齊國俗也禁女服長衣以別男女之制也我東前代君臣合祭於東郊也前朝陵墓量置守護蠲徭禁樵也雙冀崔冲李齊賢鄭夢周權近等配享聖廟也倣唐制立武成王廟也前朝文益漸始得綿種崔茂宣始學火砲並立祠鄉貫錄其後也文

科經書外講左史通鑑宋元節要三國高麗
等史也遣子弟入學中國也罷其人分卷之
法以諸司外方奴子代之也罷外方分臺之
法專委觀察使考劾也各鎮置縣尉專意治
兵也依前朝左右前後輔例楊州為後輔水
原為前輔廣州為左輔原平為右輔以北京
師也諸道州郡所置翼鎮非要害則可減可
存并量宜處之也 上嘉納○選年少文臣
及衣冠子弟肄習漢語從禮曹之啓也○上
御慶會樓觀射令集賢官講四書五經謂宗

親提調鄭昌孫曰鸚鵡能言不離飛鳥猩猩
能言不離走獸凡人猶能事其職食其力而
暑宗親則生長富貴不識此理卿既為宗親
提調當常諭之又謂集賢官曰實學根本也
國家以詞章切於用故不得已以是取人其
自為之道則捨實學不可也自今宜隨所欲
取四書五經中各讀一書予當以時親試講
○夏四月書筵官以蠶室設於東宮會講日
地隘不便請移之上曰蠶桑重事故置諸
近地且禮有夫人蠶織之文本欲中宮與世

子嬪親見女功也○頒誥命冕服詔使尹鳳等至 上迎于慕華館還御勤政門教曰予以否德叨承重托夙夜祗懼罔敢或遑廼於景泰七年四月二十日欽蒙 皇帝陛下遣使特賜誥命冕服及王妃誥命冠服屬茲大慶宜廣異恩於戲自天有命優荷寵賚之光舉國咸休用布寬大之典明日 上與 上王幸太平館宴明使○五月旱禱于名山大川及祀典外諸神驗處理冤獄恤窮乏掩骼爵修溝壑淨阡陌○教曰人於五倫父子為

重今有父母老而徙兩界者一離故鄉終不得養其父母其哀憫至矣國家已有親老侍丁之法獨於徙邊者而不恤可乎以故徙邊之人父母年過七十者許令歸養然以獨身歸養則妻子無依挈家歸養則終養之後哀怨如前何如而可乎且此非古典乃世宗一時權宜之法也有親老者歸養之後欲勿復徙邊其令政府議啓○諭八道觀察使曰大抵農事須以時播種若失鋤治則終為無用雖欲鋤治食不贍則人未力役卿體予意

鰥寡孤獨不堪耘田者寬徭役給口糧勿使失時且兩麥最切於農食諸邑要取償納每於未刈之前知數置簿民未擅食甚為無謂卿勿執古隨時處宜曲盡布置副予至意○命自今京中則月季外方則節季錄用刑之數以聞○六月集賢殿學士成三問朴彭年河緯地李塏柳誠源前節制使俞應孚等謀復上王事覺論死或言梁誠之有懼色疑有陰事上曰此時何人不懼誠之從我久必無是事遂令具致寬官誠之慰諭誠之感

泣姜希顏李季甸等亦詞連司諫權技等請
鞫之上曰情狀未著吹毛求疵則有損於
大體也不聽仍命罷集賢殿其所藏書籍令
藝文館掌之○諭三南觀察使節制使處置
使曰近者昇平水陸將帥不勤鍊兵成禦之
具全不介意若一朝有鼠竊則何能臨危制
變乎兵法曰毋恃其不來恃吾有以待之予
將遣巡察以觀能否卿其益勵忠誠毋損國
家威靈○雷震建春門下教責躬求言○命
北邊烟臺使人訪問論賞○秋七月更定歷

代始祖位版曰朝鮮始祖檀君之位曰後朝
鮮始祖箕子之位曰高句麗始祖東明王之
位皆加之位二字○領議政鄭麟趾上疏曰
秦燔詩書聖道不明有宋諸儒發揮經籍聖
人之道如日中天我朝勃興崇尚經史動師
聖賢家法甚善 殿下亦無書不讀貫穿古
今優優之政皞皞之治已著觀聽夫豈偶然
哉然一心操捨之幾甚可畏也願 殿下日
覽經史事事切已發號施令必質諸經史則
民安物阜和氣自臻災變可弭矣臣雖不言

時務然經史所載皆時務也 上手書答曰

予雖因一時之弊革罷集賢殿予常覽者經
史常思者民事常敬者天地神明但德有不
逮才有不能智有不周以此常懷憂惱耳卿
言與予深契敬服敬服○上觀稼于衍禧宮
至慕華館閱兵設小酌還宮賜軍士酒○命
今後出使復命者及守令萬戶察訪因事來
京者並引見以為例○命賜七十以上老人
宴篤疾廢疾人亦令所在饋餉○教曰獄囚
三限之法雖累申明官吏視為文具或因事

故或托辭證不明牽連歲月且有情理曖昧
終涉疑獄而拘於文法未即決遣令諸道觀
察使遣首領官于諸邑辦理滯囚其曖昧冤
枉者及笞以下囚人並皆放免具辭以聞○
免慶州等十餘邑今年田租之半貢賦雜徭
一皆蠲免以失農也○遣左承旨韓明澮宣
慰明使于瑞興義州兼付事目廉問民間弊
瘼上諭之曰卿與予同心同德一體之人
故特命卿按察卿之耳目即予之耳目也仍
賜貂裘一領

事目

一多收

稅糧斛

面一

賦役不均

違法濫刑

一獄囚淹滯一軍民情願一可革積年巨弊
一元惡品官鄉吏一驛路弊瘼一岳嶺棘城
防垣築城便否一武才卓異
人一無名微飲一防戍匪跡 ○右議政李思

哲上疏言為治之道不越乎遵守舊章而已
世宗大王以高世之見絕倫之智凡所施為
動遵古典憲章法度昭如日星實我朝鮮億
萬世之典則也乾健不息每御便殿受常祭
仍行視事講論治道誠萬世子孫之懿範也
伏望一遵 世宗故事或每日或間日視事
上御書溫批明日即視事○上御思政殿謂
史官金利用曰予之失史官亦言之對曰規

諫非小臣之任也 上顧承旨曹錫文曰其
言何如錫文對曰上自公卿下至百執事人
君之失皆得以言也 上曰然史官失言
矣仍命罰以酒曰予之得失萬目所見不可
諱也史官當從實詳記今後講武史官必備
二員慮一員有故而未及詳記也承旨等亦
須記之然我國紀事之文不及中國但求不
爽實而已工拙不必論也○九月命典醫監
惠民局濟生院造賣救急之藥俾民不夭札
○諭咸吉道都節制使楊汀曰予新即位野

人爭欲來朝拒之則沮其投化盡送則驛路
有弊卿可權輕重擇其酋長約其儼從以送
○上謂鄭麟趾等曰進賢退不肖相之職也
卿其得賢良如申叔舟者薦之也仍論人才
之難得曰德勝才者固鮮才勝德者非徒不
可用用之則反有害矣又論創業易守成難
曰守成之君生長富貴逸豫怠惰不務憂勤
惕勵也後世人主不可不知○冬十月設養
老宴於大明殿耆老共二百二十人命前郎
將金自海進酒謂羣臣曰自海前朝人也今

乃在此詩曰殷士膚敏裸將于京是也極歡
而罷○命明使宴享外申禁油蜜果○召承
旨等視事設酌命注書鄭垠此後侍宴侍食
雖不命皆入叅謂曰所貴乎儒者以其知治
國平天下之道也如欲平治捨儒而何若等
一有驕心見武官之秩高者曰汝雖班在我
上安能如我寵榮乎則甚不可也近日集賢
殿儒士頗有驕心予命革之似若過焉亦矯
枉過直之意也爾其戒哉○教戶曹曰上之
奉養過厚故下之供億難支於是不能治生

相率為盜彼盜者破產困窮亦未免作盜是上之人驅民為賊也厚奉之弊至於無民可不重耶予自即位以來務崇儉約設詳定所磨勘用度有司以為屬上之事不可過約大巨供億亦不可輕減是大不然推其義於予當用斛飯糞酒耳戶曹速與詳定所同議自闕內至諸邑一應經費無遺定式使吾民田稅貢賦軍役外一無所與專治生業○十一月諭八道觀察使曰我國地小官多民受其瘼予於京畿并合數郡吏惡而民樂之予欲

從民之情并合小邑卿知此意可并之邑可

割之地悉商度以聞

事且一本邑與應并合之地考其居民官穀出

納及詞訟往來道里遠近一并合之後使客往來四隣州郡道里遙遠必經宿之地支供

有弊與否并審度一并合不必兩邑或三邑或四邑可并為一如此則土地均齊自無犬

牙相入然不得已合屬他郡之地并審一本邑與并合之邑人吏官奴婢民戶之數山川

區域并考○諭八道軍民等曰予為汝等父母常

憫汝等困於官吏侵虐如一應差役免富強

侵貧弱如進上貢物例科之物倍數分定濫

用贏餘如擅自聚民營造作弊如以一時之

怒枷杻滯獄或至損命囚家僮動經旬月蕩

盡產業如稱為反同

或給雜物布貨而取
息俗皆謂之反同

使

酷吏四送村落一切徵歛如連結商賈防納
貢物如廣占屯田役民耕獲如潛招匠人多
造器玩互贈隣邑如浚民膏澤公行賄賂如
視官物若已有及適無餘新官又督民營辦
如支待使客徵歛於民雞巢葱蒜以至瓢罌
之微如要譽使客不慮民弊至以紬絹米豆
稱為宴幣私贈帶妓如猾吏弄法恣行侵漁
不能禁制此等之事皆汝等所因也今下令
貢稅常徭受教行移之外擾民之事一切禁

斷汝等知此專意兵農事父母育妻子安心
生業禦敵闔兵等事汝所不避宜各自以為
任若有守令侵暴事則可直來告予仍命觀
察使鏤榜邑門使愚夫愚婦無不周知○十
二月夜甚寒命兵曹量給草氈於諸門直宿
軍士

丁丑

二年春正月朔上御勤政殿受朝賀○

始親祀圓丘初東方自檀君感生祭天以報

本

祭天壇在江華摩尼山

而新羅高句麗百濟以及高

麗皆因襲祭天我太祖定都漢陽倣前朝

制度築圓丘於南郊祀天禱雨 太宗初即位以正月上辛祈穀于圓丘尋因政府言以爲非天子不得祭天遂罷圓丘之祀會天久旱不雨有言秦在西故只祭白帝我國在東亦宜祭青帝也藝文提學卞季良亦言諸侯而祭天者魯杞宋是也吾東方檀君自天而降非天子分封之地故 高皇帝亦知我國之祭天而許以儀從本俗法守舊章蓋謂海外之國始受命於天也 太宗從其言復祀圓丘以及 世宗初年猶禱雨於圓丘然議

者終以為不便罷不舉者有年至是 上深
 納梁誠之疏中郊天享帝之語決意祀圓丘
 命有司撰具儀註時日倣中朝用正月十五
 日 上齋戒具冕服詣壇行祀如儀 圓丘壇
 三尺高五尺十有二陛三壇每壇二丈五尺
 周垣四門燎壇在神壇南廣一丈高一丈二
 尺戶房六尺開上南出○雅樂樂章迎神惟
 皇昊天臨下有赫敢用菲儀以御來格○奠
 王幣嘉王既陳制幣亦潔粢陳明裡對越肅
 肅○進俎有踐籩豆苾芬粢稷既薦大羹騂
 牡孔碩○初獻清醑既載樂具入奏酌彼康
 爵以妥以侑○亞獻我將我享黃流彌瀼上
 帝既歆不遐伊通○終獻威儀棣棣祀事孔
 明洋洋如在享于克誠○徹籩豆既戒既飭
 式禮莫違宗祝駿奔廢徹不遲○送神維天
 界矜既右享之庶幾夙夜永保天威○望燎

百禮既洽享祀不忒萬有千歲景命有僕○
自迎神至望燎依大明集禮以來鍾宮奏之

禮畢還宮受百官賀賜諸道大酺三日明日

行君臣同宴禮饌品倣中朝會禮務從簡略

司藝金守溫撰進祀天後君臣同宴樂章曰
天眷大東聖神誕作德冠百王功加一國有
嚴圓丘上帝臨赫肇舉殷禮神人闡覃式
燕于朝需雲需澤載賡明良受天福祿○

領議政鄭麟趾等請上尊號曰承天體道烈

文英武行會禮宴於勤政殿又賜耆老宰樞

宴中殿宴諸功臣之母○定宗臣封爵之

制以顯祿興祿以下為階○視學策士○以

禁令太多民間騷擾命禁條五十件外并除

之○上幸舊邸召扈從宗宰置酒曰此吾豐沛也昔漢高云富貴不歸故鄉如衣繡夜行歌大風而樂之卿等亦我沛中父老極歡而罷○上覽重試居魁人李永垠對策甚奇偉召語之曰昔唐太宗不喜得遼東而喜得薛仁貴予於汝亦云○三月命自今常參時陳形名於前以為例

小交龍旗一燾一令五衛旗五大角一小角一抬搖

旗一皆忠義備奉持角則吹螺赤

○上謂戶曹判書朴元亨

曰古人云勞於求賢逸於任人今以卿為遠接使以迎明使予則無事矣兵事則予自都

統府時已嘗留心若戶曹事不暇及卿其勉之○命功臣子孫三廟外別為一室以奉其祀從禮曹之請也○夏五月教禮兵曹曰予欲振文風武氣作育人才預植國家之根本儒生三通易圖說者武士彎弓百三十斤者方許赴試不必備額隨才多少試取○教戶曹曰義倉之設本欲賑貧乏今聞京居富強者或暗請執吏賑貸之際率先多得以為酒肉之資甚者用為貨殖貧乏者無所依托終至飢餓有違義倉本意自今敢有如此者其

執吏及官負並以制書有違律論去年失農
京外穀貴飢民丐乞者多外方則已令諸邑
列置賑濟場京中宜分送東西活人院但慮
貧民惡與病人雜處可於普濟弘濟利泰院
三處別置賑濟場差人監場又令五部官吏
輪日往來檢覈違者科罪○諭義州牧使李
茵曰本州一國初面臣鎮近來凋弊予欲使
之阜盛未得其策今聞卿興利除害庶務修
舉一新部內予甚嘉悅卿其益勵不怠以副
予意○命吏曹罷冗官百餘員○始立注書

記注之法○教曰予即位以後言官不得盡
言一則以予備嘗艱厄民之疾苦言之不介
意一則以予好佛言之必怒一則小事言之
必曰瑣瑣一則以予有嚴威言之恐罪以此
進退商量不能展職予知其弊久矣予方經
綸敢不念祖宗故事言官宜知無不言專
以體君安民為慮以致隆平○領議政鄭麟
趾上疏乞骸骨上以御札答曰予方倚卿
以待豐亨豈敢勞之宜念艱屯卧以治事○
秋九月慶尚道觀察使進嘉禾三穗二穗却

之○教曰成均館養育人才然雖有才教不
勤則不成雖有人試不預則難用故激勵數
試以登庸之此其大旨也予承大亂之後庶
務紛糾未暇興學育才然而學官無一人陳
者甚非國家建學委任之意今後每月季錄
書生所讀書以聞予將親講焉又以諸生難
得書籍命梁誠之錄藝文館所藏書籍以次
刊行○冬十月教曰苑囿非人君遊樂之所
也供祭祀講武事而已今講武場延袤廣遠
無益於國而禽獸又從而害苗其遣官審度

定其界限自餘聽民耕獵○先是文宗命
上撰兵要一書簡帙浩多至上慮不學
武臣難於遍閱遂就原本務加精約使武臣
輩居常熟讀○諭諸道節制使曰國之大事
軍政而已軍政之要在節制教閱整器械固
城郭故今置巨鎮於諸要害處各統若干州
郡其鎮將又統於都節制使卿身受方略司
一方生靈之命卿宜益勵心力期顯成績思
永流芳所宜節目條于後○十二月命禮曹
叅判李純之副正金石梯議定日月交食推

步之法○冊海陽大君為王世子司諫院
上䟽曰古聖王之教世子也立太傅少傅太
傅審父子君臣之道以示之少傅奉世子以
觀太傅之德行而審諭之逐去邪人不使見
惡行是以教諭而德成福被生民功流後世
竊見我世子光踐承華禮成嘉聘春秋亦少
長矣宜日近保傅與之遊處左右前後無非
正人然後習與智長化與心成而中道若性
也今宮僚一日一接讀訖遂退豈嘗從容啓
迪陳說是非使優遊自得哉一傳衆咻求其

齊而不可得願自今賓客逐日進讀朝晝夕
講臺諫入侍師傅會講而凡諸官僚遴選端
良敦重之士久於其職勿輒遷易庶幾元良
德義日益成就國本永固萬世無疆之休也
上嘉其言命書舊例以入○命王世子行入
學禮謁先聖退詣博士行束脩講經

國朝寶鑑卷之十

國朝寶鑑卷之十一

世祖朝二

戊寅三年春正月國朝寶鑑成先是世宗命權躋鄭麟趾等撰太祖太宗兩朝寶鑑未及就前年春上命集賢殿大提學申叔舟權擘等設修撰廳輯太祖太宗世宗文宗四朝治法政謨為書七篇凡一暮乃成叔舟等具箋以進上覽而善之賜叔舟等鞍具馬郎廳韓繼禧等三人並加資復錫宴以寵之○新鑄大鐘閣懸于街上以為晨昏之節

○教曰今諸將雖有豪邁之資射御之能不學兵法則是特敵一人之勇耳使讀兵要予欲時時親講俾知用兵決勝之策○閏二月六典詳定官等進所撰書 上親加裁正○

上視學○三月遣吏曹正郎安迺于原畿諸邑察勸農役民修堤堰等事○立醫學考講法以申叔舟為醫學都提調教曰業貴精不貴多古之儒者各專一經況醫術人命所關尤不可不精今醫員方書浩繁不得精熟臨症投藥莫知其要與其多而不精莫若分門

專業且醫書非博古精敏者未易通曉並選
文官兼習可也於是禮曹條具節目以進且
言世宗朝所撰醫方類聚備載諸方然卷
帙浩穰粹難刊行姑以簡要方書分門講習
從之○上行常參謂申叔舟曰傷和氣召水
旱實由於刑戮近因弭盜無方特令初再犯
十貫以上並處絞然律外之典行之未安其
自今並依舊律施行又問叔舟以楮貨便否
叔舟對曰楮貨無用故民皆不利每稱古者
用布之時然不可輕廢自今兼用楮布便也

上命戶曹議啓○擇軍士能彎弓百二十斤者名曰挽強隊以為侍衛於行幸時從兵曹之啓也○夏四月諭諸道觀察使曰戶籍不明軍丁多漏待豐年則成籍無時置都會則贏糧往來有弊奸吏夤緣增減卿其巡行諸邑面諭守令凡二十歲以上錄籍以啓勿致騷擾予將親覽考其能否仍命兵曹漢城府悉刷京中閑良○復行戶牌法上謂左贊成申叔舟等曰戶籍不明何以則盡知戶口之數叔舟對曰欲明戶籍當復行戶牌之法

上然之令承政院具事目以啓乃下教曰標
信皆圓則戶牌宜方且欲令百官先佩以示
諸民自今大小臣民皆佩戶牌○幸西郊觀
新水田防川○諭平安道觀察使節制使曰
李滿住童倉等野人遠來叩關不可遏其來
附之誠非徒李滿住童倉其他亦然略其僑
從厚待上送野人一以仰中朝一以仰我國
彼既不廢事大之禮我當示以字小之意卿
其知悉○教曰為國之道厚倫成俗而已咨
政府其議興化礪俗之方以褒孝烈選教官

等十餘條具啓○復成均館四部學堂儒生
額廩初養士原額為二百人間因歲歉有司
奏減一百四部學堂廩食亦皆權罷至是大
司成李承召因輪對力請復舊許之○五月
右司諫徐居正等上疏曰天心仁愛人君以
水旱災異譴告之人主戒懼敬謹則禍消福
降怠忽簡易則災咎必降我國家近年以來
雨暘不時年穀不登今年之旱又甚於前年
水田不苗赤地千里言之至此不覺流涕宋
仁宗時京師大旱諫官王素乞親行禱雨曰

陛下禱必以誠不誠不可動天明日仁宗親
禱太乙宮雷雨大至願 殿下命禮官講求
祀典親行禱雨如前代故事且荒政所先經
費為重今六典等修撰非朝夕急務并皆停
罷焉 上答曰予其更謹天戒益務省察不
煩卿等之憂遂親行太一祈雨醮禮于昭格
殿夜半雨○三道賑恤使韓明澮啓言近因
凶歉所餽義倉之穀大半未收每當春節無
以賑民軍需亦減而民間積年所餽其數甚
多并收其息必不能償昔常平之法李愔行

之於魏耿壽昌行之於漢皆有成效民蒙其利今依常平倉例當春夏穀貴時增價以買布秋冬穀賤時減價以換米則官無督徵義倉歲增利國便民實為長策請令諸道觀察使姑試一二邑從之○命以古鍾城為體察使行營常時則留鎮鏡城防禦則巡住行營與諸將表裏分據相為聲援從咸吉道都體察使朴元亨之言也○上觀稼于西郊饋農人酒肉○六月飭京外罪囚毋得淹滯以致損命○上謂都承旨曹錫文等曰人君常自

儉約然後百姓可以富足今後祭享外御供
飯米毋得用細粳率用中米可也錫文對曰
中米至麤不宜供進上曰然則用次粳○
兩西螟設祭捕之○命議政府舉文武堪為
將帥者三人○京畿觀察使以臨津縣監河
如德不治啓罷之亡何上因邑民狀告審
知其善治即甄用如德憲府言後必有違道
干譽之人誘民狀告也上曰如卿等之言
則必使人主拘於觀察使之權制於司憲府
之說一無所措托權於下然後朝廷尊而國

家安其可乎○命禁閭巷間托以招魂邀僧徒設餅果羅幢幡于街上犯者并罪僧徒及家長從憲府之啓也○教曰祭以誠潔為貴不在繁華今以我國不產之物費用無極至於傷民豈祖宗之意耶仍命除文昭殿及諸陵祭花草所入朱紅○秋八月上行常參右司諫徐居正奏曰殿下即位之初勵精圖治每受朝啓以求直言其後寢不如初一月之內朝啓之日或有或無而數觀射於後苑願殿下慎終如始上曰予所與觀

射非寺人之徒皆宗宰大臣故以為無害於
義然所陳是矣甚喜言路之開也○上幸箭
串坪大閱將士分左右廂肄習陣法使承旨
賁法醞慰諭將士○易學啓蒙補解成命刊
印頒賜于諸文臣及成均館儒生先是 上
在潜邸以禮樂兵陣醫卜之理皆本於先天
易而先天易之門逕又具於啓蒙但其語意
微奧類非凡學所可領悟於是親為要解剖
析精密至是命諸儒臣復撰補解刊印廣布
親為序以弁其卷曰予窮世法遍試能事精

莫與精道莫與京者易也一理甚真兩儀分
殊變化不窮常然大用返心照觀無有二極
遠超聞思該括動靜是故正性天得為命人
主出治之本百物托命之門四聖流教羣賢
佑化自有書籍未嘗侔此予在潜邸偶因問
易者略著要解然只欲諭子弟而已到全方
務育才唯在心上精功乃得開豁聰智茲用
命諸儒臣添作補解既成廣布庶使學者得
免墻壁焉○九月命金鈞等以諺文註初學
字會○製發兵符分送于各道觀察使節制

使○命各司官吏考滿者稽其所掌諸事一
無錯誤然後遷轉決訟官吏亦稽決訟多少
遷轉從吏曹之啓也○教兵曹曰驛路者國
家大脉也而朝廷忽之有司慢之今作數條
期令必行惟爾兵曹其速奉行無踵前轍每
節季考諸驛殘盛黜陟察訪○上親撰訓辭
十章賜世子謂承旨李克堪曰古之賢君作
訓戒遺子孫子雖無識亦有父道乃述所懷
以賜世子大略而已卿自初受任教世子宜
知此意與諸傳詳著訓辭為終身佩持之物

○諭京畿觀察使金連枝曰予聞嶺南習俗
勤儉治水田必秋冬耕之春又耕之或糞以
牛馬矢除草者為上農京畿則一度耕二度
耘何暇糞田以助地力乎習俗好尚不同卿
其因民勤惰盡心勸諭○冬十一月教諸道
守令曰天生烝民立以司牧天不能自為必
借之人君人君不親督庶務必委之百官然
則人主與百官均是代天理物君不恤民事
天必降之殃禍若所為合於天心則歲豐民
和康強壽考子孫逢吉守令亦如是焉若體

予意愛民如子刑罰無濫清白勤儉則現有
超賞光家及孫名垂後世若貪刻苛怠貽弊
於民則即受刑戮身死家亡為世罪人夫十
目所視其能掩乎予以好生之德思濟一國
近放遣筭以下罪囚猶慮杖以上罪囚亦或
有矇昧冤枉者嚴冬繫閉非命殞歿天心必
矜汝等體予至懷急錄可放罪囚以聞○十
二月天甚寒上慮鑿冰軍民之凍死遣禮
曹正郎尹孝孫等于江上賫酒饋之遣內醫
賜藥物又以酒肉饋禁府典獄之囚繫者○

罷兼判吏兵曹事○諭咸吉道觀察使咸禹
治曰本道興王之地從仕者少可當東西班
人訪問選揀其祖系職姓名具錄以啓

已卯

四年春正月書雲觀不啓月食 上問故

對曰 世宗朝教以月食未滿分則勿啓故
不敢也 上曰自今雖未滿分亦啓○右正

字許琮上疏言日月食曆家之定數然列之
灾異者盖人君所當則者天也所當畏者天
也不可以常數而忽之也 殿下所以答天
譴不過曰法 祖宗斥異端絕遊畋御經筵

而開言路為之先言路開則四者可行國家
可安上御書賜批命加琮一資○上觀獵
于豐壤城山召宗宰野人等設酌仍幸離宮
御朝啓廳謂左右曰太宗居此宮時世
宗受朝啓之處也遺跡宛然不勝感愴予亦
重修春秋講武舍于此矣○命徐岡撰蠶書
註解○上召見輪對官語之曰予常患未能
日接百官蓋大臣每於常參朝啓接之小臣
秩卑未得人人而接之然今日小臣將為後
日大臣者也臣之於君易致怯縮未能悉展

素蘊爾等肆志舒體悉陳無隱予當採納言
雖不中亦不之罪古人有言曰先有司赦小
過舉賢才又曰宥過無大刑故無小故犯之
人不得不懲至於小過固當宥之爾等轉諭
同僚○命文臣講四書武臣講陣法臨試以
為式○夏四月命事大文書考畫官以承旨
差定以為例○知中樞府事鄭陟請以宋儒
真德秀諭同僚四事十害印頒中外使各盡
修已治人之方許之○上御翠露亭觀稼承
旨李克堪製詩以進命金守溫序之○賜備

急藥于北邊戍禦將士命節制使令醫隨症
治療○成均館生貢崔自濱等上書請久任
兼司成金鉤俾盡教養之責上以御書答
曰子等之意實合予心後當改授特賜酒殽
可會一歡○大雨命注書往視金吾典獄漏
濕分遣宣傳官往五部審水邊人家傾危者
令移接他處○六月命奴訴主事關綱常者
令法府鞫之以為法○上錫宴于成均館仍
賜樂憲府言文廟不當賜樂上曰樂為國
家不廢之物則夫豈有正於朝廷而邪於成

均之理乎所言甚無謂也○以霖雨過多停
供上及外方進膳又令三品以上極言得失
無隱諱○以養蠶條件頒中外○擇文臣年
少者許琮金宗直等十人並除閒官讀書仍
賜中庸或問各一件○秋七月命校書館刊
印武經十八件下送咸吉道○八月禁御鞍
金銀飾○命右承旨李克堪弼善洪應撰女
訓○九月左承旨李克堪上書言治平要覽
史家之大全而前皆所無之規模也我世
宗右文興儒留心載籍如資治訓義綱目訓

義左傳韓柳文杜詩註解大小絲綸集兵要
三綱行實等書非一然有開治體為後嗣之
觀感者訓義二書及治平要覽也請令校書
館印頒從之○上御內苑命諸將以小形名
習陣法衛將都鎮撫兵曹堂上議兵略奉禮
郎許琮等五人護軍吳幹等十餘人講武經
○冬十月兵政成上命大臣勲臣及兵曹
訓鍊官述陣法為書親加裁定○奇正圖譜
續篇成上召判漢城府事李純之出示潛
邸時所撰奇正圖譜及外篇曰篇中課命之

法引而不發其與崔灝元撰集於是純之等
撰進上親加筆削為三篇名曰續篇○十
一月命輪對官勿拘定數臺諫及諸司各以
衙門進對○教曰常叅官拜訖輒出君臣之
間不無踈隔自今常叅文臣堂下講經書武
臣堂下講兵要陣法醫官等講醫書○上御
忠順堂以鈴川府院君尹師路為左廂大將
行護軍梁誠之為右廂大將習陣于後苑復
召治平要覽修撰官盧思慎許琮等講經書
內醫曹敬智等講醫書講肄生徒薛柱等講

漢訓注書金順命等寫真草書○十二月減
司僕馬二百五十匹牛十五頭停薦新外朔
望進供以京畿告歉也○上行常叅謂同知
中樞府事金鉤曰當今儒士精於經學者絕
無留意文章者亦罕登名仕版安於小成金
中樞父為師表必知興學育才之方其與承
旨李克堪共議之○教曰平安黃海江原三
道人物凋殘比之於家一面無牆予欲募民
移居三道應募者良除職賤復戶十年優給
土田豈無有志效力者乎政府議條件以進

仍遣輔德李綱等于三道募民奠居復命新
徙者優給義倉米及農牛農器新墾田免稅
五年○史曹啓曰文臣專業學問者少請擇
三品以下年少聰敏者十五人兼藝文館職
令仕本館習業從之○命承旨都鎮撫自今
每二人直宿先是承旨鎮撫各一人直宿闕
內至是右承旨李皎然與都鎮撫飲于直中
醉卧不能對上教故有是命

庚辰五年春正月元良哈大護軍金這比與阿

比車合兵千餘潛屯會寧長城外毀木柵入

寇咸吉道都節制使楊汀率營兵七百餘人
邀擊大破之斬首五十餘級賊多棄牛馬器
仗而遁於是汀以捷聞 上下諭褒嘉賜弓
矢表裏賞將士綿布○二月命諸道各驛量
其遠邇分屬諸邑從兵曹之啓也○野人尼
麼車兀狄哈非舍等來朝初野人浪孛兒罕
性凶狡誘諸種屢擾北邊 上遣人鞠誅之
至是尼麼車等至 上召見言孛兒罕之罪
尼麼車等叩頭拜謝深服 上之恩威未幾
正朝使咸禹治到會同館建州衛童倉齎酒

殺來見東向叩頭仍指其衣曰是皆 殿下
所賜潛然泣下且曰孛兒罕謀逆伏誅我當
為國藩屏云○命宋處寬梁誠之等校正孫
子註解○夏四月以保太平定大業為祀圓
丘享宗廟之樂初 世宗考定雅樂以景安
肅安雍安壽安之樂奏之于宗廟又製隨月
用律之樂以用於宴享會禮最後朴堧上䟽
言俗樂作於土俗如雅頌之有國風不必盡
廢宜釐正以為上下通用之樂 世宗遂以
國初鼓吹樂寓以雅音旋宮之法製為保太

平定大業等舞曲俾用於宴享會禮之終及
上初即位親享宗廟還御慶會樓設飲福宴
見保太平定大業之舞顧謂鄭麟趾曰觀於
此可以知祖宗初業之艱世宗制作之
盛也亡何命以樂學及慣習都監合為一司
稱樂學都監雅樂署及典樂署合為一司稱
掌樂署齋郎舞工樂生屬於左坊樂工屬於
右坊樂生稱嘉成郎左坊令乃教曰制禮作
樂非聖人不能故歷世千萬無或有更張者
聖人出世難故也世宗以天縱聖智製諸

樂舞未及用之此時不舉後將廢棄豈不惜哉自今肄定大業保太平發祥鳳來儀等新樂而盡廢舊樂其人物軒架之數肄習節目速議以啓遂以梁誠之成任為樂學都監提調教習新樂 上別初曲譜以上一至上五下一至下五為慢中數三調之紀而凡居中者為宮自宮以上為數自宮以下為慢故雅之清黃為俗之上二清林為上五黃鍾為下三濁林為下五皆不循襲 世宗朝保太平定大業之曲譜又罷雅樂舊制代以俗樂新

制雅樂堂上有絃歌而無匏竹堂下有匏竹
而無絃歌俗樂堂上堂下俱有絃歌匏竹又
雜以觱栗琵琶之器雅樂迎神各以天地人
異其數天神六成地祇八成人鬼九成其餘
裸獻以下堂上陰呂右轉畢曲堂下陽律左
旋畢曲陰陽合聲相間迭奏每節各一成俗
樂無分天人自迎神至三獻皆各奏九成又
各有引入引出為十一聲而圓丘堂上堂下
俱用夾鍾徵音起調畢曲宗廟堂上堂下俱
用黃鍾清宮起調畢曲有陽無陰有倡無和

故亦無左旋右轉之節通一祭凡四十七成

皆出 睿智裁定諸臣莫能窺其制作之微

旨先是 世宗朝定大業保太平歌詞全用

龍飛御天歌十五章至是以非祀享樂歌命

崔恒改撰樂章

國丘俗樂樂章迎神佑命荷玄休代理主羣生崇報遂窮

壇翹竚臨雲軒

熙文之樂○進饌以我蘭栗與我齊明或

肆或將祗薦我誠神其居歆赫赫厥靈

隆

安之樂○初獻於穆玄宰神明莫測禮嚴必

祀庶幾降格 基命之樂○亞獻皇皇上帝

臨下有赫我膺明命翼翼欽若假我烈祖配

天禮陟成秩百神祀事不忒我羞孔庶我牡

孔潔顧予精衷再崇我爵宣威之樂○終

獻禮既備樂既奏觴之重誠以侑錫我社帝

其右有楚蓬濯征之樂○徹蓬豆於薦靜嘉蓬豆
 且騰風輪兮安之樂○送神神載起兮返玄宅兮
 寧安之樂○宗廟俗樂樂章迎神世德啓我
 後於昭想形聲肅肅薦明程綏我資思成
 熙文之樂○奠幣菲儀尚可交承筐將是帛
 先祖其顧歆式體心莫莫熙文之樂○進
 饌執燮燮踏踏登我俎豆豐安之樂○初獻
 苾芬孝思維神其右豐安之樂○初獻
 列聖開熙運炳蔚文治昌願言頌盛義維以
 矢歌章於皇聖穆淳海徒慶歸附日衆基
 我永命皇矣上帝求民之莫乃眷與區乃
 遷明德仁不可失于胥景從其從如市匪我
 之私匪我之私維仁之歸維仁之歸誕啓鴻
 基於皇聖翼祗服厥辟聖度繼志眷倚斯
 篤大亨以嘉景命維僕雙城瀟漫日維天
 府吏之不職民未安堵聖桓輯寧流離卒復
 寵命是荷封建厥福於皇聖祖邁駿厥德
 仁綏義服神化隆洽懌彼島夷及其山戎孔

淑以懷莫不率從航之梯之教我繹繹於赫
厥靈邇安遠肅於皇我聖考猷亂保宗祏
謳歌與望隆敦讓顯美德媚于天子方懽
憂惶聖考入奏忠誠以彰媚于天子方懽
光猷思齊聖母克配乾剛戡定厥亂贊謀允
臧猗歟貞明啓佑無疆剛列聖宣重光敷文
綏四方制作既明備大猷何煌煌左龔右翟
求率維救功光闡太平禮樂方隆世德作
日既九變式昭光烈盡善保太平之
樂○亞終獻人著我列聖繼世昭聖武庶揚
無競烈是用歌且舞於皇聖穆建牙于朔
通篤其慶肇我王迹須之豪據雙城我聖
桓于濯征狙獫亡拓我疆客麗失馭外侮
交熾島夷縱噬納寇恣睢紅巾魚元餘孽
屬尊僧跋扈胡魁陸梁於皇聖祖神武誕揚
載宣天威赫赫堂堂懍我敵戒虎貔鼓厥
勇若翰飛動九天正奇塘斧亢旋自縻竹
斯破孰我支耆定武神之為我雄我奮如
雷如霆胡堅莫摧胡險莫平連安我奏我
訃哉神戈一揮妖氛倏廓無侮無拂祚我東

國麗主拒諫取行稱亂我運神斷我師我
返天人協贊義旗載回順乃多助天休震
動士女悅豫後我寵綏壺漿用迎既滌穢惡
東海永清彼孤臣煽禍機我皇考克炳幾
神謀定世以靖鳥夷匪茹處劉我圉爰赫
我怒爰整我旅萬艘駕風飛渡溟渤乃覆其
巢乃擣其穴譬彼鴻毛燎于方烈鯨波乃息
永真鰈域於皇列聖世有武功盛德大業
曷可形容我武有奕進止維程委盛德大業
觀厥成定大業之樂○徹籩豆中盛于豆
于豆于籩有飫其香來假儂然我禮既成告
微維虔雍安之樂○送神裡祀卒度神康
樂而洋洋未幾回我倏而霓旌
鬋鬋雲馭邈而興安之樂
○五月命

王世子師傳賓客臺諫每月初二日會講賓
客臺諫每十日進講○禮曹啓曰訓民正音
先王御製之書東國正韻洪武正韻皆先

王撰定之書吏文又切於事大請自今文科
初場試講三書依四書五經例給分終場並
試吏文依對策例給分從之○六月教曰宥
過錄才人主之大量也今可用之才拘於罪
籍未得展用亂臣親兄弟子外徒流付處安
置定役人有欲立功贖罪者令諸道試才錄
名以進○吏曹啓曰數法居六藝之一歷代
設科取士魏唐間尤重之惟我世宗慨曆
法之未明博求諸書命文臣三四人推求曆
法數年之內皆能通曉每旬取才考其勤慢

近來學官以闕都目失望規免不願屬若過
數年勢將廢革願復勸獎隨才叙用依醫書
習讀例計仕授官所業卓異者加資從之○
詳定所啓曰蘇軾言古者坐於席故籩豆長
短簠簋高下適與人均今土木之像巍然於
上而列器皿於地是使鬼神俯伏匍匐而就
也朱子亦曰夫子像設在臺上春秋釋奠陳
籩豆簠簋於地是甚義理位高莫卑古人所
譏請自今各位并設卓子除鋪席之制從之
○上行常叅大司成徐岡司藝孔頴等請設

明經科取士上即命自明日開場圓點滿七十以上者許赴初試啓蒙通略者四書中抽籤一書通者五經中自願二經通者左傳綱目資治續編宋元節要中自願一書通略者並許赴殿試而初試則不拘額數○秋七月頒新定經國大典之戶典○以申叔舟為江原咸吉道都體察使兼宣慰使以洪允成副之即日發行往征野人初野人等屢犯邊鄙及孛兒罕誅始頗知懼會明使馬鑑至北野人等以孛兒罕軍事訴鑑鑑右之由是野人

復謀寇邊 上召叔舟於文泰殿命進酒携
手散步於南欄語以北伐之意叔舟力贊之
於是 上出御忠順堂召韓昉澮具致寬等
議事遣田昀議于姜孟卿權擘遂密授方略
於叔舟等遣之恐野人聞而驚遁以叔舟兼
宣慰使往見鑑請館于城內厚慰以安之命
設江原咸吉兵分道進攻野人復以御札諭
平安道觀察使曹孝門都節制使黃石生曰
後門野人竊發不已今命申叔舟臨機處置
彼必逃歸建州衛合謀報怨邊警隄備不可

疎虞但兵機尚密卿獨知此意勿露形跡○
命八道觀察使及開城府留守搜訪古今東
人所製詩文雖殘篇短章無遺錄進○罷戶
曹參判尹士昕職士昕中宮之弟也擅因
政府典吏政府以啓中宮聞而瞿然曰士
昕不聽我戒以至於此上先罷士昕職復
令憲府鞫之○八月咸吉道都體察使申叔
舟大破野人搗其巢穴叔舟至六鎮部署諸
軍分道並進藩胡乘夜襲營營中喧呼欲戰
叔舟堅卧吟詩以示閒暇營中乃定遂追斬

九十餘人乘勝直窮其巢穴勦殺四百三十餘級焚蕩室廬殺獲牛馬千餘數先是韓明澮等數言皇朝弭兵之使方在後門而舉兵攻討終不順於事體也 上不得已下書叔舟使之相幾善處又書紙尾曰用兵之害猶豫最大三軍之灾莫過狐疑尋語承旨李克堪曰五日無報則必不舉事明日捷書至上大喜以平定北方告宗廟御勤政殿受百官賀命僉知中樞洪逸童為宣慰使賁御書及法醢表裏慰諭叔舟使叔舟子淠乘駟往

覲其父始叔舟將行 上引入便殿指墻下
瓢蔓曰可及此物之結子否叔舟醉對曰晚
種不盛未必結子至是瓢偶結一子 上命
剖而為盃書四句於盃心曰卿雖笑我我瓢
既成剖而為盃以示至情使遺叔舟後又以
陶象瓢造盃鐫四句於內每當曲宴用之以
示不忘功之意○上欲分咸吉南北為二道
使監司兵使各治之以問於申叔舟叔舟啓
言鏡城以北之兵各守本鎮吉州以南之兵
分運入番於兵營號為助戰而都節制使領

之南關資北鎮以為藩籬北鎮資南關以為
助援其勢相資若分置二將各執兵權權貳
則爭勢離則乖兵分則弱仍舊制便也但軍
士試才都節制使觀察使分端川南吉州北
而各試之則庶免失時之弊也從之○冬十
月 上率王世子西巡平壤親祭于永崇殿
太祖真殿又祭于檀君箕子東明王殿御大同館
設養老宴老人男女凡百人申叔舟自北來
朝錄北征功加洪允成等資命叔舟試取平
安黃海二道文武士 上臨浮碧樓觀察使

曹孝門都節制使黃石生進宴 上見壁上

有高麗毅宗詩遂御製詩命隨駕宰樞賡和
又令叔舟記之赦沿路諸邑死罪外諸囚韓
明澮請於平壤營行宮命寔基於古闕遺址
諭咸吉都節制使朴炯曰平戎之後虜必生
心卿選精兵數百千或擊東西或軼南北使
賊莫知所備用兵節度予豈遥授大抵善保
為上成功次之生事最下○上至自平壤御
思政殿設宴慰北征將士御製樂府三章命
彼之管絃○諭諸道觀察使曰近來學校勸

勵之方不無弛緩予親幸成均館并聚四學
儒生講經製述使之激勵卿亦體予意每於
巡行時親到鄉校講經製述戒飭教官其或
怠惰者罪不可貸卿其曉之

辛巳

六年春正月戶曹啓曰屯田之法載在六
典請令諸道觀察使就諸邑未置屯處擇荒
閒之地作屯田從之○親享宗廟教曰禮煩
則怠心生可諭諸執事駿奔○以具致寬為
咸吉道都體察使命宰樞往餞于普濟院復
以御札諭之曰一勝一負兵家之常一則知

足不為已甚貪功是也二則不輕敵是也三則相時而動勿輕舉勿必攻勿必不攻深如淵動如雷無詐無愚權以佐智是也○上御忠順堂試成均四學儒生五百六十餘人問從民西北之策上嘉進士成倪善對賜倪及第○三月命宗親宰樞有疾者遣醫給藥一如世宗朝例○夏四月上謂都承旨金從舜曰欲令外方軍士或五日程或十日程互相往來習陣以慣行役之勞令兵曹磨勘○命崔恒金良璥同詳定六典○五月忠

勲府請於端午進豐呈宴 上曰姜丞相孟
卿之卒未久也不許○上謂戶曹叅判李克
堪曰卿世子之師今世子書法過於予又曉
解文理予甚嘉悅大抵為學之道與其竟日
誦一紙耗損志氣莫若涉獵專書以增辭氣
卿其務令多讀以資博洽慎勿令勤勞讀書
志氣衰耗而終為腐儒○秋七月以成任曹
孝門為樂學都監提調 上謂任曰卿多才
多藝予甚嘉之然我國之人於天文地理等
雜學稍有知者而至於樂則識者蓋寡今工

人輩所學皆是淫聲不可言樂卿體予意留心於樂又問學之可及朴堧乎任對曰堧則未必及學之亦或有得上曰要在專心耳仍謂黃守身等曰今之樂亦多未精予欲擇曉音律者數人俾為提調一革哇沸之音誰可者守身等薦禮曹叅判曹孝門即以任孝門為提調○以黃守身李克堪及兵曹判書金師禹為牧場提調諭諸道觀察使曰國之強弱在馬故問國君之富數馬以對昔元世祖欲以江南為牧場予亦欲以江原黃海之

地并合為一大牧場然不可以人易馬今且
令諸邑各占一山水草俱足分處十匹以至
千匹則何憂不成乎卿速審某州某山限九
月晦間乃啓○命王世子觀稼于喜雨亭宗
親大臣諸宰從行仍命宣醞○禮曹啓曰教
養人才國家重事請自今京外教授官教導
學長擇學問精熟堪為師表者授之成均館
四部勤慢則本曹常加檢察外方則觀察使
親自講問移文本曹轉啓如有成效者特加
褒獎京外除生貢進士及升補入學外年過

四十不學閒遊者各其教官報本曹移文兵曹充定軍役以懲其餘守令不能修明學校者令觀察使嚴加糾理從之○冬十月上親製兵鏡召入直衛部將講之部將卜承利善對上曰儒士不如也陞授上護軍○命申叔舟等註兵家三說○召洪允成等於後苑與諸將及破敵衛用小形名習陣○上行常叅謂申叔舟李克培等曰將帥之任貴精兵法予固知卿等不事弓矢舉以為將者欲使諸將務學兵法也仍召入直衛將令克培

試陣法皆不能通曉 上曰若但以武才任人則如汝之才殆不可勝數汝等須思擢用之意仍顧世子曰諸宰樞皆汝父執異日盡為汝臣宜厚遇之鷹隼雖猛苟無羽翼反不如凡鳥矣○十二月 上召吏兵曹堂上及臺省抽諸司郎名籤問所掌雜物出納見在之數司僕濟用郎對甚悉命加資廣興倉官不能對罷其職○吏曹議諸司官吏考績節目以啓凡書筵官臺諫政府郎承政院注書諸道首領官不考績命如其啓

國朝寶鑑卷之十一

國朝寶鑑卷之十二

世祖朝三

七年春正月掌令柳季藩言金師禹長兵曹而其妻弟李克培長吏曹不可使政權摠于一家也上曰臺臣自不察耳其熟思之有頃上御兩儀殿召承旨金從舜謂曰臺諫擇其可言之事而言之則人主聽用得納諫之名而臺諫亦得獻替之譽日者憲府言黃致身冒濫奉石柱賊汚而予皆聽之是也若顧大體偶思輒言則人主不聽而得拒

諫之名臺諫聲聞亦從以卑何所處而可乎
○教曰平虜衛正兵京則兵曹外則守令每
月初二日習陣訖仍使鍊藝○親祀園丘還
御勤政殿受百官賀召見琉球使臣普須古
等慰諭其遠來且教曰予今付送中朝尋訪
書目歸報國王所有書冊送之可也以天下
而失其本况海外之國未必有也然幸有一
二本須宜送之仍賜普須古等園畔宗鏡錄
宋元節要○二月教曰凡決事官公事分為
大中小三等限日畢決若不得已則具由以

啓已有成法近來司憲府義禁府刑曹漢城府官吏雖已過限一不以聞甚不可也其速分等以啓○夏四月命抄錄醫經及諸書養牛法使醫生四人習之○遣分臺于八路察監司守令非法作弊○上謂都承旨洪應曰近者士卒精鍊戎器亦完但儒學或有廢弛之慮也應請勿數設科目取僥倖非材者鄉學生雖年老勿定軍役以儲養之上以為然教曰廣學校之道卿其主之○上觀獵于東郊命左右廂大將用形名以觀用軍節度

○上行常叅以御書發問于諸將曰胡騎三千人精馬良倏忽衝犯則大將未及用形名衛將不動衛將未及用形名部將不動部將未及用形名統將不動統將未及用形名旅隊伍率皆不動若待次第用形名則殺擄殆盡陣已亂矣我雖三萬見敗必矣然則反不如胡騎之揮鞭吹嘯鼓進金退而已待之亦有術乎平時習陣之時號為將帥臨戰禦敵之時罔知所措則不可謂之將也今諸將各陳禦之之術○甘露降于後苑○五月上

導世子身教之外輒以言開發其知嘗曰人主之道愛民節儉為本書曰民惟邦本本固邦寧凡目前所見之物莫非民膏汝雖小物必尋其源以除民弊則其本固矣又曰人主切不可逸亦不可多事多事則忽忽劬勞不能剗理惟本性定然後處處事事安然不動雖勞四體亦不勞矣此汝之終身所行者也又曰以心役氣無以氣役心所謂莊敬日疆安肆日偷者是也且以政事言之兵刑乃其大者汝於兵則近觀閱習庶幾知之而至於

刑則汝未必知之刑者死生所關不可不慎也○上御思政殿王世子及申叔舟權學等侍召成均生貢孫比長等五人命各講所讀書而使世子聽之遂語比長等曰汝等在學宮雖讀經書不知朝廷禮制遂為腐儒今召汝等非徒欲講經書使習朝儀耳仍賜御膳麥飯曰儒者多智高而不遜汝等若或臨民則須降志而勿驕今賜爾以麥飯爾等知之乎對曰唯○上慮文學之士漸不如古命都承旨洪應擇文士有學術者以啓應以

判內賓寺事李坡等二十三人以啓遂命坡等兼藝文館職每朔望朝會後親講經書又月再賦詩○命西班上護軍大護軍護軍每日十人輪對以西班無衙門不入對也尋命內禁衛軍士等亦許輪對不視事日則承政院書所對之言以啓○六月教戶曹曰雞豚狗彘之畜無失其時七十者可以食肉此王政之所先我國土風不事畜養或有賓祭之需尚且未贍自今京外大小家咸畜雞豚京中漢城府五部外方觀察使守令常加考察

每歲抄具數啓達其中孳息最多者論賞其
不用心者論罰官吏亦憑考賞罰○分遣監
鍊官於諸道考察軍器製造○教刑曹曰刑
獄重事一或偏係見枉必多至於治盜尤難
或因宿嫌而誣引為盜或指為真盜而實賊
不現或賊物雖現而色樣相似京外官吏用
法深刻不問正賊有無例皆拷訊言端雖不
一以賊物相同為辭賊物雖不同以彼盜文
案為證援引傳會羅織成辭至於枉法亂杖
捽髮批跪使愚者認服姦者幸免是豈司獄

平反之道耶其令治獄官吏將上項可疑事件精白虛心本之仁恕行之明允要期得情毋殺不辜敢有如前違法濫刑誣陷無罪者當治罪不饒惟爾刑曹體予至懷曉諭中外○秋八月作新甲使洪允成及衛將等試之召宗親大臣講兵書○以李克堪為刑曹判書上召語之曰卿職帶書筵不可授以煩劇之任然刑獄重事非卿不可故特授之○命自今職兼藝文者每月初一日十五日抽籤三人或講經或製述其通不及等第錄簿

以啓○都體察使韓明澮入朝 上諭之曰
今富寧之賊亦草竊爾且不得利而還因一
小竊又興忿兵是徒結怨生事兵法曰先為
不可勝以待敵之可勝今東西自守不暇而
兼以攻人則非安閒蓄力之策且夷狄之情
緩之則附急之則叛以蠻夷攻蠻夷之術正
方今之善謀卿宜姑且忍辱蓄力相機而動
但示威使不得安業亦足致困也○上幸學
謁先聖退御明倫堂宗親文武館官諸生分
東西班四拜訖還御昌德宮後苑設酌閱陣

○九月諭諸道觀察使曰山林村野隱伏沈
滯素有聞望不能自售者其令界首官薦舉
○百官進箋賀白鹿 上不受○上幸鐵原
府觀打圍洪允成多有失誤 上謂申叔舟
曰君使臣以禮臣事君以忠允成愚惑無情
人也予不之過然予心本不含蓄苟有可言
必皆言之如青天白日也 太宗嘗以不言
人之是非為道故其時功臣李茂有過而
太宗不言卒致叛逆予意以為君臣之間各
言所懷可以兩得相安如允成者不宜任大

事今罷其職令安享富貴而已○冬十一月
諭諸道觀察使節制使曰國之大事在祀與
戎諸營鎮將視為餘事兵器馬匹全不點閱
軍士因此亦不自備每當點閱潛相借僨名
存實無今將遣人糾察大明黜陟卿宜知悉
考察○上謂世子曰德源君曙之第不新構
而買之所以除弊也今戶曹請買六十餘間
大屋此非予本意也昔世宗朝大君諸君
之家皆有定制今若買大屋則後世鍾愛庶
子者必援此而增益之終至於百餘間故令

戶曹改擇以啓汝生於宮中長於婦人之手
豈知細民之事大抵教世子備嘗世法為上
身常勞苦為中循途守轍為下○行常參
上謂禮曹判書李克培曰名分不可不嚴昨
日司饗院進膳雜用世子器皿甚不可也然
則父子同器君臣同器奴主同器名分將紊
矣與野人奚擇哉世子尚且視膳事孰大於
御膳也其司饗別坐罪尤重焉宜丁寧告戒
之○十二月上台書筵官尹弼商李克基
等謂曰人君以天下奉一己故奢侈易而崇

儉難古人以服澣衣為人君美德所以著崇
儉之難也不知者曰田舍翁得此過矣以金
銀珠玉華飾嬖妾肆其寵樂或與之荒湛于
酒而不知民生之疾苦以至敗亡此乃醉生
夢死耳何足道哉予本不好色欲飲酒則與
諸將相飲絕不與宮妾飲且予有昭容一人
少女一人有罪則或囚之誰敢與予言哉大
抵賞罰不可少弛少弛則天下不可治昔韓
昭侯藏弊袴以待有功溫公書諸史策夫弊
袴之藏市井尚且不為而溫公書之者所以

重賞罰也須賞當其功罰當其罪方可須以
予此言教誨世子俾勿忘焉○教曰勸善懲
惡國家大機一有不正本末倒置今有司一
切拘於舊弊雖灼知其情務欲苟合傳旨抑
勒取招歸怨於上而解說於下甚無謂也此
弊憲府尤甚凡推劾之事以苛刻為賢曰本
府之法固然是則不如無憲府也自今因循
不革者予必痛懲其諭中外

癸未八年春正月上語韓繼禧任元濬曰自
古起家之主征戰四方才力相資者馬也故

常不能忘情於馬如劉備之的盧唐宗之六
駿我太祖之八駿是也予雖不事征戰然
方世宗盛時馳射角勝三軍皆服者繫唯
馬力是資掛釜之騮雖快於心靖難之驃尤
所不忘今茲得疾益以思舊也仍賜名其馬
為圖而贊之○上御忠順堂試藝文文臣成
均儒生等講經書遂觀後苑農蠶之象賜承
旨等衣籠各一世俗每歲上元設田家農蠶之象以爲一年豐稔之兆自
辛巳以來上令承政院分左右張於後苑戲決勝負自于耕舉趾條桑蠶老幼醉飽之狀禽獸草木之形皆立竹爲幹束○命禁草為像競尚精巧無不各盡其態焉

婦女之乘馬入闕者○二月教漢城府曰經
國大典徭賦條都城內凡有修治役使坊里
人毋及鰥寡孤獨篤疾廢疾者官吏不察非
止孤獨至於老少婦女一皆督役後有如此
者必痛治之○上御序賢亭試文臣三品以
下叅策親問教曰予於武臣則皆常任事知
其能否而汝等常不任事不知賢否故特令
製述以觀汝等若有能者予將擢用矣至昏
賜燈火以出○夏五月初集賢殿之罷也其
所藏書籍移置於藝文館至是 上慮 世

宗朝辛勤哀聚之書籍散亂遺軼命梁誠之
彙分類別整束藏弄誠之竣事入侍以口吃
不能詳陳所蘊為袖劄以進曰竊觀歷代書
籍或藏於名山或藏於秘閣所以備遺失而
傳永久也前朝肅宗始藏經籍其圖書之文
一曰高麗十四葉辛巳歲御藏書大宋建中
靖國元年大遼乾統九年一曰高麗國御藏
書自肅宗朝至今六百六十年印文如昨
文獻可考今內藏萬卷書多其時所藏而傳
之者乞令藏書後面圖書稱朝鮮國第六代

癸未歲御藏書本朝九年大明天順七年以
真字書之前面圖書稱朝鮮國御藏書以篆
字書之遍着諸冊昭示萬世或依新羅及前
朝盛時例別建年號以為標識臣又竊觀君
上御筆與雲漢同其昭回與奎璧同其燦爛
萬世臣子所當尊閣而寶藏者也宋朝聖製
例皆建閣而藏之設官以掌之太宗曰龍圖
閣真宗曰天章閣仁宗曰寶文閣神宗曰顯
謨閣哲宗曰徽猷閣高宗曰煥章閣孝宗曰
華文閣皆置學士待制直閣等官乞令臣等

勘進御製詩文奉安于麟趾閣東別室名曰奎章閣又諸書所藏內閣名曰秘書閣皆置大提學提學直閣應教等官堂上以他官帶之郎廳以藝文祿官兼差俾掌出納上覽而善之亟稱其可行申叔舟曰誠之自少強記其在集賢殿仕罷時書其舊所思一字於掌上到家遍考諸書以窮之上曰凡人之於學不為則已為之則必須如是予亦書一字推類旁通者多矣○六月正言崔漢良言宗親不可典兵上怒命下禁府既而召入

問曰凡進言於君者必先審思可否然後乃敢發之汝於此事其審思未漢良對曰思之已審上曰宗親何為不可任事對曰續典云尊位重祿不以事夫任宗親或有罪過罪之則傷恩不罪則廢法所以不可任也

上曰六典科條予所變更者多汝何不一言而獨言此乎不任宗親之說古人有不取者又有功臣不可任事之說功親一般今自申叔舟以下盡棄勿用可乎漢良無以對上曰善諫者審思熟慮使言必聽計必從身獲

安榮君享令名民保而國治不善諫者反是
豎儒輩專務釣名每有大政率易輕言是何
足與議大事乎予患此風久矣今當悉革乃
已命收漢良告身仍謂左右曰人主言動當
如青天白日皎然皆令人知汝等職帶春秋
可悉書此○秋七月命宗親宰樞各舉所知
有將才者○上常置粉板于座右輒書所思
以施諸事一日列書漆林六畜種桑等十餘
條出示承政院議敦勸之方仍教曰此予記
事板也巧記不如拙書政院亦有是否○閏

月 上御便殿與左右語及田野事曰細民
跣足跋涉於山蹊多為蛇虺所毒予甚悶焉
或言觀音草醫蛇虺毒神效 上遂命政院
馳書於諸道守令遍諭民間○承旨以旱請
祈雨 上曰將必有雨及午雨果作 上喜
甚御雨服散步後苑○八月命校書館印兵
要百本頒賜諸將○上行常叅承順君溥龜
城君浚銀山副正澈河城尉鄭顯祖都承旨
盧思慎等侍 上謂左副承旨崔善復曰知
臣莫如君卿等之才予已知之卿亦有才固

非常人思慎才調卓異志氣發越溥天性質
直可任以事然未免有遲緩之弊顯祖性本
正直善於傳命然或有昏晦之處澈心氣開
朗然本質未厚常有太速之弊浚心志明徹
才調過人然無學術是可恨也此數人者予
使之不離左右勤劬從事者欲矯其過引其
不及以合於中也○九月命右贊成崔恒同
知中樞院事梁誠之等撰東國通鑑教曰本
國史錯亂無統予欲以東國史略三國史高
麗史等書參酌損益勒成一書以便考閱也

仍親授凡例○冬十月命以兵書分三等兵
要武經七書兵將說三篇為一等陣法兵政
為二等講武事目為三等俾鎮撫部將宣傳
官講之精通者給分○上御勤政殿行朝參
王世子侍 上謂世子曰汝所服木綿衣甚
薄陋然耕種耘耔採花織絲勤苦以成莫若
此衣汝當見衣則思女工之不易見食則思
農夫之孔艱儉以自奉罔或不勤節用愛人
使民以時且大臣國家所賴以存亡者不可
不重古人有曰敬大臣況今大臣皆吾故舊

乃汝父執尤不可不敬也○咸吉道都節制使康純啓言建州李滿住童山等送箭於毛憐衛約合兵共寇中國或寇朝鮮 上諭四道都體察使韓明澮曰當因此機殄殲無遺然虜之連結我之利也嚴兵待來來則敗之勿示入征之形俟其他向以兵搗穴此以蠻夷攻蠻夷之術也於我無損豢禍相時策之上也○十一月設弘文館從梁誠之袖劄之言也禮曹判書朴元亨兼大提學同知中樞院事梁誠之兼提學都承旨盧思慎兼直提

學其直館博士著作正字等兼官各一員多
未充亦未及建館定制○十二月 上御思
政殿決囚謂世子曰刑獄至重人命所關人
主所當軫念者若官吏不察情實捏合成獄
曰此人可殺而人主漫不之察亦曰可殺於
君父之道何如也人主每遇獄事當求其可
生之道 世宗常謂文宗曰刑獄雖笞罪不
可容易處決予未嘗敢忘汝其體此意也○
命申叔舟等定兵書口訣○上製醫藥論命
任元濬註解印頒

甲申

九年春正月

上御勤政殿受朝賀設會

禮宴宴文武百官野人倭人亦與焉○奪承
傳宦官李得守告身充定造紙所搗砧軍得
守為人巧黠以遲滯公事抵罪 上語筵臣
曰 世宗朝承傳宦官崔濕田昀為上金忠
次之今得守慧黠過於此數輩非至明無以
辨奸吾豈墮於術中匪教匪誨時惟婦寺自
古誤人家國者未必非此輩也○分遣監察
閔懷金良奉等于忠清道周行郡縣察守令
之歛民作弊者以將幸溫泉也○命世子遵

文宗世子時故事入叅朝啓○二月濟州獻
白鹿○命領議政申叔舟左贊成黃守身等
議定六典○上與中宮韋溫陽之溫泉○上
將行養老宴聞英宗皇帝諱音遂命止之
停朝市七日○行宮庭畔有古井命開井有
泉湧出源深而清賜名駐蹕神井○上與中
宮至自溫泉受賀大赦○禁暑月以椒皮末
投水捕魚○上謂領議政申叔舟等曰世子
年長在宮中其所與皆婦寺之徒而起居之
甚罕行步之不習何以固其肌膚之會筋骸

之東周公有言先知稼穡之艱難孔子曰愛之能勿勞乎忠焉能勿誨乎予於大君聽此構一室使世子出居於此嘗與士人居俾知外事叔舟等稱善○夏四月命刑曹較正笞杖之大小○命刻草啓字圖章印啓下文書以為標○六月梁誠之上疏曰經以載道史以記事非經無以證出治之源非史無以考理亂之迹經與史不可偏廢也 殿下每月朔望特召成均學徒藝文詞臣親賜講論此漢明執經問難唐宗討論文籍之盛心也今

成均生則學官日講禮曹月講春秋都會三年大比著師儒得人則固可以作成人才矣乞更精擇藝文兼官二十人分理學史學為二業治周易易學啓蒙性理大全者凡五人治胡傳春秋左傳春秋史記前漢書者凡五人治通鑑綱目通鑑續編宋元節要者凡五人治三國史記東國史略高麗全史者凡五人而五人之中又以三品一人五品二人參外二人為率皆兼習四書詩書禮記每初一日殿講十人十五日殿講十人三朔內三度

不通者左遷本職三度通者特加一資經史
兩學各置都提調二人提調三人常加考察
焉 上是其言○秋七月 上御華華堂召
兵曹佐郎崔灝元司醞署令鄭沆討論樂理
互有得失遂製下樂說○頒三甲戰法 上
御慶會樓下召宗親諸將及內禁衛壯勇隊
之有勇力者作三甲戰分三隊隊各九人令
聞鼓而進相推以朱槍勝者給仕仍教曰此
合戰之大綱也交刃分鬪人馬俱困是時臨
機制勝速先取利非預與士卒氣合心合道

合者不能也以其甲逐乙乙逐丙丙逐甲惟

取點背故名三甲戰法仍命頒于軍門其法以二

十七人分三隊為甲乙丙隊各有三統統各

有一將二卒三隊各屯一隅人持小槍及小

槍槍端鐫朱戰則相逐以槍刺其○命梁誠

背戰罷考其背朱點驗其勝否

之任元濬等分諸學門門置六人以年少文

官隸之曰天文門曰風水門曰律呂門曰醫

學門曰陰陽門曰史學門曰詩學門○引接

輪對官數十人復命各錄其所陳之語以啓

○八月梁誠之上書言用兵之道嚴軍法恤

備軍門護軍丁閱軍士凡十事 上嘉納○
戶曹判書曹錫文以母喪去位以金國光代
之錫文判戶曹七八年國家經費一以儉約
為主 上每稱真戶部至是去位國光亦習
於科條 上稱其諳鍊使之詳定諸司橫看
國光以為已任悉心不懈推移增損多出其
手○教政院曰王世子儀物事關名分所當
詳辨予入中朝見皇太子儀仗反不如親王
蓋親王已成君而太子未成君也本朝 文
宗為世子時儀物稍多然 世宗欲使之攝

位特命加之耳非常禮也○禁士大夫家婚姻及外方使臣褥帳用綵幣綵段諸司南行官負母得開印○命功臣鄭麟趾子崇祖申叔舟子瀟等三十五人每一日二人依承傳宦官例出納公事蓋欲觀其賢否也○謝恩使權技先遣通事啓言獐子入寇中州邊鄙之狀 上下諭于平安道都節制使楊汀曰近聞三衛獐子三十餘人入開原等處掠五人而去遼東恐與建州衛連結作亂以兵千人禦通遠堡鳳凰山等處云予謂中國不能

和戰夷狄而畏首畏尾自疲於奔命如此其可笑也已前日使卿觀兵示威攻心伐謀今更思之是代人以自勞非計也宜按兵勿動驕虜而逸之使自生釁以成蚌鷸之勢此以人攻人之法也○禮曹進成均館九齋學規

學規大學論語孟子中庸詩書春秋禮記周易為九齋每年春秋本館堂上及禮曹堂上二負藝文堂上一負臺諫各一負會坐講所讀書三處句讀精熟義理融貫方許以次陞齋若一時通數書許起陞陞至易齋者每式年直赴會試又於式年講舉子四書三經自願他經者及欲講左傳綱目宋元節要○冬歷代兵要訓民正音東國正韻者聽

十月吏曹啓曰前此四部學堂教官擇經明

行修者以西班職帶之專為教訓今革西班
兼帶之法以成均館兼任四學訓誨不專學
校日廢請四學教官各二復以西班代之以
專訓教從之○命申叔舟韓昉澮崔恒盧思
慎等撰靖亂日記○分遣軍籍使於三南忠
清道慎後甲慶尚道權攀全羅道姜老授事
目起送 上欲更張軍籍成出事目又選朝
臣之精幹者為教差官先試于三道○以河
東府院君鄭麟趾等為都廳領中樞院事沈
澮等分為十二房各率郎官一數學重監一

就於慶會樓下詳定諸道貢物仍命永順君

溥承傳出納○十一月命鑄箭幣

箭幣形如柳葉箭鏃

長一寸八分莖一寸七分莖錫兩面分鑄八方通貨四字以一箇準楮貨三張

先是

上召議政府六曹叅判以上議布幣經印楮

幣行用箭幣設立便否仍下御製泉布論示

諸宰諸宰言以箭鏃常用之物為幣則人皆

收用故易致散失勿行為便

上曰歷代用

幣不同皆隨時而用之箭幣雖古人所未用

然有益於軍國不可不行也

國朝寶鑑卷之十二

國朝寶鑑卷之十三

世祖朝四

乙酉十年春正月命密城君琛寧海君瑯雖持服家居亦並給祿○夏四月上御康寧殿召臨瀛大君璆上黨府院君韓明澮等議用人都承旨盧思慎醉言曰後進承旨皆已陞遷臣獨未遷請改授他職明澮曰自請除職其可乎上命罰思慎酒遂使尹子雲解金幣帶思慎即除戶曹判書上閱官案中四品以上可合承旨者諸臣每舉一人上輒

問曰其人儒耶喉舌出納當用讀書人非儒
莫可既而曰無以易李永垠遂除永垠承旨
○上親製兵法大旨旨兼藝文及儒生等講
問又令諸將依大旨各自作文而宰樞第其
高下 上喜曰不意武臣乃能成文各賜弦
弓○命闕內省記外入宿者依擅入宮城門
律論○教曰國以民為本民以農為本農以
盡地力為本盡地力以勤為本勤以遠慮為
本此五本者人莫不知而世皆姑息宴安予
欲大舉隄堰川防示利於民澤及貧窮爾大

小百官下及軍民如有欲陳利害者可來面
陳○召持平盧好慎謂曰民非農無生農非
牛無以耕牛之為用甚大今士夫家凡宴賓
必宰牛此風不可長爾憲府其糾察隨聞隨
劾且察諸道監司不即訪問孝子節婦以啓
者行移推考○秋七月 上御思政殿 王
世子侍焉召河東府院君鄭麟趾等入侍語
之曰卿以為國之道教世子於是 世子避
席而聽麟趾曰修齊治平之道布在方策然
其要惟知為君之難而已 上曰何謂也麟

趾曰人君正心以正朝廷正朝廷以正百官
豈不難哉○上御勤政門行朝參延訪治道
令各陳所懷謂判漢城府事李石亨等曰人
有恒言家國天下然其實不越家國而已家
有良主則庭宇淨修鄉黨稱賢國有賢君則
朝廷肅穆庶官無曠故人君廣詢博訪芻蕘
不廢然後可以成天下之賢而兼天下之善
然聽言有要言之善惡各異人主悉皆聽納
則其弊必至於善惡混若欲分辨則其弊必
至於言路塞惟當揔攬權綱執其兩端見賢

焉然後用之見可殺焉然後殺之推之萬事
莫不皆然今欲聽羣下之言令入侍文武諸
臣盡言不諱而武班二三人應命其他將相
一無所言豈以為順之則福逆之則禍各自
畏罪而不敢言歟抑以予為不肯採用而不
言歟至於予出一言皆曰可而莫敢矯其非
此豈君臣之間可否相濟期至隆平之意乎
卿等其以予言布告在位○命梁誠之盧思
慎等撰五倫錄○八月上幸喜雨亭觀水
戰○以梁誠之為大司憲上諭之曰予當

語卿以八事曰風聞曰明聞曰虛聞曰實聞
曰實見曰虛見曰實知曰虛知卿宜舍虛取
實盡心奉公誠之對曰官吏非兼用風聞無
以懲惡但重事則啓聞取旨後舉劾上可
之○上與中官王世子幸溫泉初上令政
院馳書于京畿忠清觀察使曰行幸時費入
已於橫看詳定詳定外一物毋得歛民如有
否者罪當不赦至是上聞忠清觀察使金
震知都事姜安重箕歛百姓狼藉行賄於宰
樞鞫二人得其實遂斬震知安重以盧思慎

為假觀察使

上語尹弼商曰祖宗朝雖有

臧污敗露者亦未嘗置諸重典而予則當撥

亂之世不得不用重典今若徒遵

祖宗寬

典而欲求治安清泰其可得乎○大饗護行

軍兵于內庭○上至自溫泉受百官賀召隨

駕宗宰設酌○上召司藝鄭自英直講俞希

益等講易夜深乃罷明日謂崔恒曰易理儘

無窮矣朝臣中有能知易理者其錄名以啓

○冬十月

上御丕顯閣

王世子侍焉召

成均生貢楊守泗等十人講經書使世子執

冊曰古人云惟數學半講問於人大有益焉
汝其問之○上召吏兵曹堂郎行親政復命
司藝鄭自英直講丘從直俞希益主簿俞鎮
就入侍論易教曰四人精曉義理吾欲寵遇
以勸諸儒也予觀易傳中程傳甚通透朱傳
或礙滯朱之不及程遠甚故予以程傳定為
口訣四人等其以御定口訣互相論辨於是
四人等各執所見反覆不已上樂之遂賜
從直自英王圈網巾各一陞秩為僉知中樞
院事從直晚年登第至是始顯上數賜恩

寵曰古人以黃金買死馬兩人皆儒家之老
吾所以接之如此者欲待千里馬來耳尋以
御定口訣與先儒權近口訣互有異同命兼
藝文鄭蘭宗等籤標異同每於殿講時論難
是非○命禁私出入公府者以毀棄制書律
論○十一月 上謂筵臣曰曩者兼藝文等
講經書多未能通今則皆精於易理人患不
盡心耳未有不可學者也且如武人自謂非
我業而莫之學焉殊不知人而不學與禽獸
奚擇哉仍召鎮撫黃事長問所讀書以四書

一經對 上問中庸首章天命謂性及理氣
先後之分事長不能對 上顧史官房貴元
曰汝試言理氣先後對曰天地未判理先於
氣兩儀既分氣先於理然混元之理周流無
窮非理何以成氣乎又問理有善惡否對曰
理無不善又問理無不善而有聖智昏愚何
也對曰理譬則珠氣譬則水以明珠投之清
水其光洞澈是聖智之理氣也以明珠投之
濁水其光淹晦是昏愚之理氣也然亦有開
明發見處四端是已因其開發而繼續光明

之則昏者可至於聖也 上曰非儒者不能如是○十二月教曰自今巡廳分二所每所巡將一人監軍一人同坐點檢宣傳官兵曹鎮撫所郎廳中一人受點監軍○諭江原道觀察使李尹仁曰本道比失農民不聊生蘇復之本在於務農桑通魚鹽令煮鹽所用鐵盆百部令慶尚道鑄作輸送卿其分給嶺東諸邑民○教曰自今凡有啓達之事當該官吏皆親啓之予將觀其言語進退以審其賢愚且可使公事不至稽緩也

丙戌十一年春正月 上御思政殿召三公及

諸司長官示以官案俾各議其僚屬可否○

上謂筵臣曰予欲使世子詣成均與諸生齒

讓何如丘從直曰古有是禮鄭自英曰古今

異宜不可行也 上曰世子生長深宮稼穡

艱難亦未嘗知豢養之餘驕侈易生今茲齒

讓之禮一以抑驕侈之心一以敦孝悌之義

而自英以為不可是欲以驕侈導世子也其

可乎遂命禮曹以親祀文宣王頌周易口訣

世子齒列取士開宴之意移文諸道知會○

二月教曰凡分軍命將發兵等事須考制勝
圖書凡啓下公事考啓字圖書凡問字公事
某啓公事等考定字圖書○上嘗動駕王世
子下馬立路傍侍衛宣傳官權佖等皆下馬
趨過之上即命下禁府教曰雲劒宣傳官
等見世子皆下馬而過此前無聞後無見之
事也夫天下人倫親與義而已親則愛義則
敬親而無義則禽獸義而無親則胡越是故
敬義立而人道固敬義廢而人道毀人道毀
則無君臣無五倫此不早修禮義任情行私

之極致古今天下日月昭界焉有出乎此者
若曰何得不敬則宗宰將相皆汝高秩何不
遍禮於大臣若曰將君我則是將心也將心
古人何以論之○三月 上與王世子韋學
謁聖如儀退御明倫堂頒親定周易口訣命
王世子齒列于諸生遂大饗諸生橫經問難
遠方儒生雲集凡三千餘人命設文武科重
試以申叔舟為讀券官取文科初重試 上
作泮宮易齋詩五章曰予本不慣於詩而熟
聞詩言志也志者心之所之者發之所歸

歸之所者既形則發之原者可知所貴乎詩者吟咏自得於優游之際韻協於口義融於心德就於身功成於國無非詩之教也故著泮宮易齋一篇五章會兩大作不克成禮而還○命蠲義倉五年以上未收之穀江原道今年田租之半○夏四月命同知中樞府事徐居正編輯馬醫書○上御華韓堂召崔恒韓繼禧盧思慎等講周易乾卦尋又御忠順堂召申叔舟鄭自英論太極無極之理○命宗廟永寧殿玉竹冊誥命每年一度本署提

調奉審○五月設文武拔英試先是文科一
等稱為乙科二等稱為丙科三等稱為丁科
至是依中朝之制一等稱為甲科二等稱為
乙科三等稱為丙科又命遊街時文科用蓋
武科用旗上御思政殿引見一榜設酌台
金守溫命進酒御製小詩一首令各和進○
端午日上御勤政門受朝叅入御序賢亭
召二品以上宗宰及部將鎮撫兼司僕等設
酌命兼司僕等射帷宰樞金守溫以下十一
入三品以下儒臣百餘人給紙筆或策或頌

或賦或詩各以所能製進○先是入啓公事
承旨及宗親承傳宦官宣傳官等分授磨勘
至是以事多淹滯命承旨提察以啓○上以
民間利害時政得失小民不能自達命注書
史官輪日出光化門外令欲言者抽籤陳言
史官錄以啓而 上親決之軍士則都摠府
郎官依此施行日以為常遂榜諭之曰京外
閒良公私賤隸欲言政治得失民間利害及
有抱屈含冤而不能自達者每日辰時皆詣
光化門外抽籤待問○秋七月 上出內藏

大明講解律律學解頤律解辨疑等書命大
司憲梁誠之校正分送講解律于慶尚道解
頤于全羅道辨疑于忠清道使之刊印各五
百件廣布中外○八月 上召吏曹判書韓
繼禧等議諸邑守令貪污虐民代納等事遂
命宗親銀川君攢朝臣鄭自洋等為問弊使
分遣諸道使之舉劾○革科田置職田○九
月 上與孝寧大君補等從容語及治道仍
作論備言為君之道以示左右僉曰 殿下
是言萬世龜鑑也○上御康寧殿王世子與

孝寧大君補河東君鄭麟趾等侍焉召儒臣講經書兼藝文軍資主簿趙淑講詩不辨音訓上哂之丘從直李壽男言淑稍習弓矢上曰將帥須用文臣予欲得其年少者培養卿等各舉所知遂選年少文臣之可用者三十餘人命以侍講院說書洪貴達藝文待教李瓊全刑曹佐郎河叔山為宣傳官後世文兼宣傳官昉於此○慶尚道蔚山人金有成將徙邊上言父年七十一母年七十皆有宿疾臣獨子且無兒息願乞終養事下兵曹兵

曹覆啓言有成以獨子離老親徙居遷方誠
為可矜請勿令徙居從之仍命自今親年七
十以上者勿徙居○冬十月命申叔舟等十
二人各率郎廳一人撰諸書類聚凡十二門
曰易曰天文曰地理曰醫曰卜筮曰詩文曰
書法曰律呂曰農桑曰畜牧曰譯語曰籌法
○十一月大司憲梁誠之上疏曰代納之物
最為民害先取貢案一一講求水陸所產各
就所有之郡定之不繁之物為之減省擊鼓
之法問弊之使可謂達下情矣但抽籤多煩

殞之事投匭皆誣構之漸以至麾旗於闕北
哭泣於宮側亦違太平氣像其麾旗哭泣者
置之重典以杜告訐之俗平安咸吉道路遼
遠事多可慮今後兩界監兵使勿令率眷咸
興安州以北守令亦勿率眷以除民弊以為
萬世之慮兵貴精不貴多我國人民無慮百
萬戶其中控弦三十萬精兵一十萬勇士三
萬如內禁衛兼司僕別侍衛破敵軍隊騎船
軍以至雜色騎步試才者為主戶無才者為
挾戶隨闕充補使百世不易咸吉道本興運

之地 世宗朝始建五鎮以為五大君賜鄉
至今以為義談今亦以咸興北諸郡分賜堂
上官宗親為鄉皆各置奴子一戶以固根本
之地平安道則分賜親功臣及原從二品以
上為食邑如三公食邑平壤府一千戶正一
品安州七百戶從一品成川五百戶正二品
嘉山三百戶從二品實不食租稅仍各置奴
子一戶州中之事同心布置使內外相維體
統相制至于子孫亦襲其號 上納其言命
兩界監司毋得率眷誡之又言 殿下聽政

之暇留神文教以易學詩文韻書字體樂譜
與夫天文風水醫藥卜筮農桑畜牧等事分
命諸臣撰次以進臣竊意史記所以考前代
之善惡為萬世之勸戒地理所以載州郡沿
革山河阨塞蕭何以之先收圖籍蘇軾以之
指掌作圖是誠有國之不可無也至於兵法
所以論征戰勝敗尤當撮要以訓將士者也
今以諸家兵法史記地圖並令輯錄以成一
代之典仍使殿講之日或於清燕之暇以資
治綱目續編綱目東國史略高麗史等書進

講考前代之成敗論當今之治道焉上謂
申叔舟曰兵法史記抄錄甚難誠之所撰東
國圖經予將刊板以觀○是月日南至上
受百官賀仍與宰相講易日暮乃罷○大司
憲梁誠之上疏曰祖宗實錄一國萬世之
史而太祖太宗恭靖王實錄則皆書四件
春秋館及外三史庫各藏一件世宗文宗
兩朝實錄則只書一件藏于春秋館甚為未
備然欲書之則事功難成幸今有新鑄小字
乞命興校署印出三件藏于外三庫但本國

書冊如實錄軍案例以鐵錫鎮其背或以綾段粧其衣非徒誨盜猝有急遽不得措手然又不可不曲為之慮也須令一件重大以備小盜之偷一件輕便以備倉卒之虞而兩朝實錄一件業已重大矣今小字印出之三件除鐵錫之飾綾段之衣而藏之又如太祖太宗恭靖王實錄亦以小字印出一件藏之則大小之變既無所不可而事功亦可以易成也且歲月差久文籍散失國家大典諸臣擬議將泯沒無傳乞自壬申五月至今丙

戊十一月議政府六曹臺諫承政院文書聚
于春秋館以藝文館祿官五人兼官五人每
二人為一廳各分三年而編摩之仍令春秋
館堂上考察以為日課以成重事而外三史
庫藏書之處也然寄置官舍甚不嚴密非徒
火災可慮且有他日外寇之慮乞遣官審視
擇人烟相隔處移之以全州史庫移于南原
之智異山星州史庫移于善山之金鰲山忠
州史庫移于清風之月岳山並依寺刹例給
以位田又命近村民戶守之是所謂藏之名

山之義也書籍之自中國來者雖逸猶復可
求惟本國之書苟一失之無由復得乞將東
國所撰諸書磨勘件數不足者或印或寫或
購以成十件弘文春秋館及外三史庫各藏
二件又春秋館及外三史庫文武樓內不緊
書冊并皆刷出分置藝文成均館典校署以
革混雜難考之弊弘文館春秋館所藏如宋
元史等只有一件者率皆抄名以入直忠義
忠贊衛及書房色諸司吏典就弘文春秋兩
館謄寫或以本文分送于下三道令界首官

監掌傳寫或於中外購求以備三件藏之書冊板本京中則典校署掌之外方則別無所掌既不知某書可印又不能檢舉而修補之甚為不可乞令政院下書八道如某郡某某書板凡幾張又板之刊朽與否一一開寫仍以常楮各印一件上送其刊朽不用者外使守令解由傳授而典校署考察焉銃筒謄錄國家秘書而春秋館有一件文武樓有二十一件軍器監有幾件萬一奸細偷之因以為利則東南之害不可勝言乞以謄書書寫內

外史庫各藏三件弘文館三件堅封着押其
漢字書寫者並皆燒毀以為萬世之慮今後
典校署印出書冊例將十件弘文館藏二件
春秋館外三庫典校署文武樓藝文館成均
館各藏一件焉○賜登俊試恩榮宴于議政
府遣承旨宣醞○十二月命宗學導善李孟
賢藝文館奉教成倪承文博士李德崇等讀
大明律以律學之不明也

丁亥十二年春正月 上以王世子生辰與

中宮宴內宗親及諸臣于康寧殿召崇義殿

副使王循禮與宴謂循禮曰此在坐者皆予
臣僚爾則前代之裔當待以賓禮仍命坐二
品之列令進酒曰先代之後古有欲盡殲無
遺者予則不然隆爵厚祿以奉先祀期與咸
休爾宜檢束以世厥家詩云侯服于周天命
靡常此之謂也循禮在麻田持身不謹故戒
之仍命進秩○上御華韡堂命龜城君浚等
肄習陣法以兼司僕為一廂內禁衛為一廂
揔百有餘人用羽箭竹槍馳逐擊刺以決勝
負又列陣勢周匝宮城用形名招兼司僕等

而諭之曰爾等精銳今可以一當五更加訓鍊期以一當十也○賜河東府院君鄭麟趾几杖舊制文武官一品年七十者賜几杖以扶老此法中廢至是復之○上謂都摠管尹士昕曰自古外戚未有不敗其身者汝以椒房之親無他異能位至卿相富貴已極當尋常戒懼卑以自牧慎勿驕人爾雖不驕人自敬之士昕頓首謝諸臣咸曰上教非徒外戚所當服膺在廷諸臣亦當銘佩上曰天之將降大任於斯人必先勞其筋骨苦其心

志動心忍性增益其所不能予以此語朝夕
誨世子大抵人君或長於深宮之中或起於
草昧之際其道不同日者有一公事予故為
謬書以示政府詳定所承政院皆曰誠如

上教此豈君臣相須之道乎昔之昏主有告
者曰餅生於樹麥熟於冬皆曰是予豈若是
主哉○命王世子臨決庶事時 上不豫慮

國事多淹滯命承政院非關稟旨常行公事
使申叔舟韓明澮等議于 世子施行○三
月 上召儒臣等講論性理崔延命金壽康

對稱旨即除宣傳官

上謂鄭自英曰諫官

言事類皆是古非今自英稽首曰無傷也臣
諫君雖曰無若丹朱傲可也 上以為然○
上親製窺衡及印地儀蓋量地遠近之儀象
也遂作印地儀頌曰數始於一終於十百千
萬億無窮極陰陽由是相交媾萬化紛紛世
道立天文地理卜筮學吉凶消長悉前察緣
故偶作印地儀尋山覓水可準則中極不動
射四六四正分布居四極趣正尺寸知交度
節變遠近量圖局回轉相照又相承巨細無

遺能事畢於是召藝文儒臣示之儒臣等無
一曉其義者惟司藝俞希益直講金紐等稍
知梗槩○夏四月罷左右鷹坊 上謂宗宰
曰予於酒荒色荒本無有也但於禽獸則不
能無玩好之心無益也即罷鷹坊○命都承
旨尹弼商掌刑房初弼商掌吏房適值日寒
預錄在囚之數置諸袖夜深 上趣召弼商
入問獄中輕重囚幾何弼商對甚悉 上喜
曰此吾寶臣也命仍掌刑房○罷諸營繕以
旱也○五月前會寧節制使李施愛與其弟

施合舉兵反命龜城君浚為咸吉江原平安
黃海四道都摠使曹錫文為副魚有沼為大
將往征之起復許琮為咸吉道觀察使左承
旨魚世恭陞秩為咸吉道觀察使協力勦賊
施愛吉州人也詐稱節度使康孝文與觀察
使申漸及漸父叔舟謀為不軌以撓民心遂
乘夜襲殺孝文又誘咸興民作亂殺漸遣其
黨詭告二人不軌於朝廷朝廷莫測其端倪
會富寧府軍官成以乾密遣知印李克枝從
間道具啓施愛叛逆狀上大驚召綾城君

具致寬都承旨尹弼商等議之命浚等出征授以方略○六月下申叔舟韓明澮于獄既而釋之上以二人有專擅之失命繫獄旋察其非罪釋之與議國事如初臺諫交章論之上召大司憲梁誠之試令數其罪誠之歷數叔舟之失叔舟頓首謝上曰予榮衛纔調方欲與大臣歡何發此言然敢言極諫予甚嘉之行當論賞以獎忠直賜綵段一匹誠之出上顧謂叔舟曰諫疏又必至矣○上謂世子曰汝所先務者博學問敬大臣二

者而已博學問則德崇業廣敬大臣則高而不危反是身必灾國必喪汝宜早以自牧學于古訓○教禮曹曰今所揀文臣一百七人分授易易學啓蒙禮記周禮左傳綱目宋元節要杜詩李白東坡莊子列子立期限讀畢○命親征李施愛上章慕華館大閱將士

分為九衛

司僕一內禁衛二獅子衛三控弦衛四左射隊五右射隊六壯勇隊

七彎強隊八破敵衛九

五部

東西南北中部以所居應募者屬焉百官軍

兵願從者皆戎服視事命世子就思政殿月廊與大臣同議國政下諭諸道徵兵○秋七

月四道都摠使龜城君浚等大破李施愛兵
斬施愛于軍前傳首京師北關平浚等至北
以逆順榜諭北民魚世恭躬率數吏通行村
里招徠安集魚有沼許琮及節制使康純與
施愛大戰于洪原又戰于北青又戰于蔓嶺
賊垂高據險矢下如雨官軍不得上相持有
日會親征教至純歎曰吾輩不肖以賊遺君
仍泣下士卒皆感憤扼腕有沼乃以小舟載
精兵盡衣青衣與草木混色由海曲攀木緣
崖繞出上峯俯賊背鼓譟嶺下軍亦蒙楯蟻

附而上賊大驚盡潰施愛逃去官軍欲追之
琮曰自古元戎失勢其下相圖施愛之頭將
至矣施愛走吉州盡收婦女財帛欲入虜中
州人許由禮誘賊黨李珠黃生縛施愛至軍
前斬之獻馘于朝上愍北方官吏死於賊
者命致祭錄用其子孫○命魚有沼康純等
移軍討斬建州衛李滿住時明遼東百戶白
顯賁勅諭令夾擊滿住遂遣有沼等率衆萬
餘渡鴨綠江攻破兀彌府諸寨斬滿住及其
子古納哈打肥刺等燒廬舍禽人畜悉歸上

國被虜男女乃斫大樹白而書之曰某年月
日朝鮮大將魚有沼滅建州而還捷聞上
遣使獻俘于京師○上謂弼善鄭孝常曰昔
在世宗朝文宗為世子書筵官崔萬理
朴重林等見世子小失必極諫之今未聞
然諂之甚也且如世子或事弓矢何不曰文
武雖不可偏廢未若偃武而修文也乎仍顧
世子曰儒者不可不敬予與儒者談論時以
為迂者蓋戲之耳汝勿信聽此言儒有君子
儒有小人儒君子儒尊重禮接猶恐或忽况

慢之乎○上召申叔舟等議事謂世子曰財
貨者天下之大命苟濫用之則竭矣叔舟曰
是故其名謂之泉貨以其濫用則竭也上
曰今緇衣之徒為國蠹賊恃予撫護與民橫
逆使百姓愁苦怨毒汝不可不知也又曰撫
御得則能保其國家撫御失則反不如一步
卒之賤矣○九月龜城君浚等班師錄敵愾
功進爵有差賜鐵券○上召申叔舟等議造
兵船漕船制度遂命叔舟往麻浦行船以試
之命除公私賤運米咸吉道者從良之法○

冬十一月 上御寶慶堂召諸宰樞命丘從直主理學梁誠之徐居正洪應主史學互相論難 上曰理學之中該史學之理史學之中具理學之趣仍問從直曰人性之內善固有之惡亦有之乎從直不能對

戊子

十三年春正月

上御苑觀農○三月教

司憲府曰奔競之禁本為昏夜乞哀者設也邇來科禁太嚴朋友親戚隣里慶吊迎餞之禮在人情不可無者而一切禁之是絕人之道也今後宰相家蹤跡詭秘者外勿禁可也

○夏四月 皇帝遣太監姜玉等降勅褒諭
討平李滿住之功賜白金綵緞紋繡西洋布
又賜魚有沼白金表裏○六月 上謂世子
曰為國之道必內外相資然後乃致治平內
虛外實不可也外虛內實亦不可也曩者李
施愛之亂一道靡然若非龜城則焉有今日
是故宗室親戚分布內外列于朝廷則國家
維持之術也○成均進士宋希獻疏陳時弊
數十條 上覽之御書其尾曰汝言皆微諫
引而不發必懼予惡聞耳我則不然常責不

聞之咎切求忠讜之說驚汝奇才恨我晚遇
汝之所陳無一不中吾失者爾體此意益勉
補闕即以書示世子及永順君等曰希獻真
奇才也予將大用且命議其可行者以啓○
諭八道觀察使兼役之弊無法之稅親行訪
問一一以聞○秋七月命王世子叅決庶
務時上有疾弗豫召蓬原君鄭昌孫等入
內諭以世子叅決之意仍教曰予以不次猥
受丕基無才無德變古政尚多軍籍戶牌徒
居大典等事一時並舉至於北征西征兵師

不絕是皆小民之怨咨也民心不靜天心何
安近日欲傳位者予病今五六載上則廢祭
祀下則未習陣國事陵夷既久今又得重疾
自知難瘳柩前即位哭泣之間吉凶相雜甚
不可也且予禪讓之後得瘳此疾則雖一日
得享優游之樂故予心決定必欲行之卿等
據大義固請故不獲已乃止今更思之慚愧
無地自今以後卿等分四番詣闕與世子議
定庶事於是命鄭麟趾具致寬洪允成金礦
為一番鄭昌孫沈澮曹錫文金國光為二番

申叔舟朴元亨洪達孫盧思慎為三番韓明
澮崔恒康純為四番○命曹錫文盧思慎撰
北征錄○召梁誠之李石亨等講律呂新書
○八月命構無逸殿于昌德宮後苑將欲傳
位而順養也○上出前後御製詩命梁誠之
搜輯申叔舟抄刪教曰 祖宗詩及予所製
詩將欲刊板以觀○九月 上傳位于丑世
子時 上疾益劇召禮曹判書任元濬諭以
傳位之意仍命辦具諸事鄭麟趾等以為不
可 上怒曰運去英雄不自由卿等欲違予

志是趣我命也即令中官取冕服親賜世子
世子即位尊上為太上王

國朝寶鑑卷之十三

今中書平章事



